



嘉興府志

ル 5
1574
33



門 125
1574
卷 33

嘉興府志卷六十一

嘉興府志卷六十一

兩廡先儒

桐鄉縣

國朝

張履祥字考夫全明從夢金仁山本邑人
孤母沈讀之曰孔子弟子亦足與
學好便做到大聖大賢
錄有傳作廟學記述履祥
相本之說乃履祥

嘉興府志卷六十一

嘉興府知府善化許瑤光重輯

兩廡先儒

桐鄉縣

國朝

張履祥字考夫父明俊夢金仁山來謁而履祥生故名幼
 孤母沈諭之曰孔子孟子亦是兩家無父之子只爲肯
 學好便做到大聖大賢爾勿自棄也稍長讀小學近思
 錄有得作願學記遂渡江遊劉宗周之門歸而益肆力
 程朱之書乃知陽明之學非是海鹽吳謙牧錢汝霖延

之家塾先後出傳習錄屬評論履祥慨然曰東南壇坫西北干戈其爲亂一也生心害政釀成大患實由於此於是洞揭其陽儒陰釋之隱以爲炯鑒甲申後棄諸生隱居楊園村舍著書教授居恒雖盛暑必衣冠端坐若對賓客修己教人一以居敬窮理躬行實踐爲主嘗云三代以上折衷於孔孟三代以下折衷於程朱於朱子文集語類析疑闡微晨夕不釋手謂元明以來惟許魯齋薛敬軒胡康齋諸書可與朱子相表裏其他不皆醜摘師說爲劉子粹言以詔來學論者謂履祥篤實宏遠軼薛胡而上之朱子後一人而已著有經正錄訓子語

王學辨備忘錄言行見聞錄近鑑楊園文集共三十餘卷學者稱楊園先生卒後數十年學使甯化雷鉉表其墓嘉慶六年縣令合肥李廷輝脩楊園村舊祠立主崇祀十六年巡撫蔣攸銛檄飭立主祀於青鎮分水書院二十二年縣令黎恂修墓及碑教諭仁和宋咸熙立祠學宮之偏道光四年巡撫黃梅帥承瀛疏請入祀鄉賢祠奉

旨依議其明年立主入祠崇祀

參陳梓撰傳祀徐淑艾錄序蘇愔元撰年譜

同治九年學臣徐樹銘會同撫臣楊昌濬奏照浙江嘉興府桐鄉縣鄉賢張履祥字考夫明諸生世居楊園村

學者稱爲楊園先生平生學問專務居敬窮理躬行實踐不託空言一以闢閩濂洛爲宗著有楊園全書三十卷該先儒之友烏程凌克貞嘗稱其德器溫粹仰質先聖其揆一處洞悉無疑餘姚陳梓以爲該先儒純粹如敬軒而窮研洞悉謹飭如敬齋而規模宏遠海甯祝涇稱其爲學一循孔門博文約禮敬義直方之則以仁爲本以修己爲務以中庸爲歸有以正後儒偏諛之趨而續古聖微茫之緒蕭山朱坤亦稱其邃密似薛文清篤實似胡敬齋前副都御史臣雷鉉以爲接薛胡之正脈契濂洛之正傳實先陸清獻而真知允蹈者案明儒

薛瑄胡居仁皆以抗心濂洛從祀

孔庭

國朝先儒陸隴其亦以力崇程朱正學

昌平之俎豆該先儒張履祥溫粹從容精密純正光輝篤實力正後儒偏諛之趨晦蝕之道賴以復旦洵有以接薛胡之學脈開陸氏之先聲而篤志程朱立身端直持論醇正見之

欽定四庫全書提要立身行己無愧真儒已荷

聖明之鑒察則古師先一衷正學復叨

定論之褒崇洛閩之遺緒克承鄒魯之嫡傳不替以之祀祀

文廟實足以昭

聖朝崇儒重道之至教等因奉

旨禮部議奏欽此欽遵十年十二月禮部覆奏查張履祥字考夫居桐鄉之楊園村幼喪父其母訓之成立且諭之曰孔孟亦是兩家無父兒止爲肯學好人便成大聖大賢爾勿自棄也遂專力于孔孟之學及甲申後閉戶潛修嘗云三代以上折衷于孔孟三代以下折衷于程朱所著有經正錄願學記問目備志錄初學備忘學規訓子語答問門人所記言行聞見錄近古錄近鑑喪祭雜說農書等書嘗言聖賢用心要使天地間物物各得其所

學者須從此起念方有成就又曰爲學自不欺始不欺自親長始嘗訓學者舍稼穡別無治生之道能稼穡則無求于人而廉恥立知稼穡艱難則不敢妄取于人而禮讓興其所言不越乎人倫日用之常而念慮所存恒周乎天下後世實足與經傳相發明臣等詳閱全書其經正錄一冊蓋示人以小學之基而漸臻于大學之域願學記問目備忘各書則博學審問慎思明辨篤行之功寓焉至訓子語答問及門人所記則因材之篤也見聞錄近古錄知取善之宜廣近鑑示遠惡之宜先喪祭雜說示人以重本敦倫之義至農書一冊尤惓惓以農

嘉興府志 卷之十一
桑爲急務所爲正德利用厚生者不過是也臣等覆加
詳覈先儒張履祥祖述孔孟憲章程朱立論不尙高遠
行事頗近中庸洵足羽翼聖經維持名教與僅據空言
率請從祀者有閒臣等公同酌議擬如該學政所請准
以先儒張履祥從祀
文廟其位次在東廡先儒孫奇逢之次等因同日奉
旨依議欽此

列傳

桐鄉縣

明

石朝用以元進士仕爲廉訪使無子卒葬濮院鎮西濮鎮

巨姓至今相傳燕雷濮石云新補纂

楊述字宗道永樂癸卯領鄉薦第一授宜興訓導陞監利

教諭分校四川福建鄉試稱得人景泰間擢遼府長史

勤於輔導遼王書公正二字賜之著有蘭谷集徵獻錄參袁志

仲端字惟正六歲喪父力學有年中永樂九年舉人入國

子監積分授湖廣隨州知州恤窮達隱民甚德之逋寇

丁朝龍聚眾流劫詣闕待罪尋丁母憂服除補南直隸廣德州知州致仕卒楊述稱其在官任德去刑舉動務存大體所至有遺愛

新補纂

沈榮字希仁正統甲子舉人歷禮部主事改工部左遷四川都司經歷巡撫王浩特疏舉之歷陞廣東韶州知府

慈和愛民粵之人頌其德不衰

徵獻錄參吳志

王濟字伯雨號兩舟晚號白鐵道人諸生入太學授廣西橫州判官攝州事悉其習俗利病設施皆當州故多盜自濟至戶可不閉采其風俗與故鄉異者為一編曰日詢手鏡中多預商禦邊之策事後人服其先見以母老

乞歸與僉事龍霓太白山人孫一元尚書劉麟詩酒相

徵逐為崇雅小社皆一時知名士

徵獻錄參吳志烏青文獻

于恭字克敬貢生景泰中任武岡州判解餉赴都道逢土寇力戰死子思遜得凶問一慟而絕

桐鄉徐志

楊青字士昂遼府長史述子青自幼有才思警敏過人景泰辛未進士桐鄉分縣甲科自青始由庶吉士遷禮科給事中歷掌南京吏禮二科事尋召入掌刑科陞河南僉事奉敕總理軍民招撫流移多所康濟以勞卒於官趙讓字元遜宋宗室丞相汝愚之後成化乙未進士授松滋知縣愛民下士百廢具興擢刑部主事歷員外郎出

知南甯府有惠聲子萱字慈佩宏治壬子舉人官國子

監助教以上徵獻錄參袁志

譚鏗字體仁宏治甲子舉人任泉州推官平易近民折疑獄若有神助暇輒彈琴賦詩無聲色貨利之好歸田纂

桐鄉縣志泉州府志參桐鄉徐志

邱焱字朝勝嘉靖甲午舉人授江陵知縣時盜賊蜂起白晝焚掠焱發兵捕之盜莫敢入境百姓祠祀焉陞鈞州知州以不合上官意挂冠歸舟過張家灣遇盜數百將要而殺之以舒積憤其僕盛恩進曰盜所欲得者主君也主君身膺民社不可死非命恩請以身代焱不可恩

已服髮冠服效漢紀信故事焱得脫乃歸其尸禮葬之

桐鄉徐志

祁鯨字國升嘉靖乙卯舉人視躬修整敦厲實行每邑宰

初蒞任必以禮見後則絕跡公庭未嘗私謁浙江通志參徵獻錄

王三錫字汝命以嘉興籍中嘉靖癸丑進士任保定府推官丁憂歸居桐鄉適倭寇數萬至參將宗禮軍覆阜林巡撫阮鶚移鎮邑城賊首徐海陳東等圍攻甚急鶚同知縣金燕召集紳士議守禦三錫散千金懸賞格募敢死士夜出劫賊多所斬獲海製雲梯二座夜牽其一於城下焚之其一傍北水門樓高於城數尺有沈鐸者以

計破之鐸另有傳時又有董皋者城中燭盡從間道出取之

警禦四十餘夜賴以支給賊盛為樓櫓撞竿以撞城城

幾壞居民朱姓者為緝索以挽竿賊技窮參徵獻錄禦倭紀事

濮文起字三槐諸生有謀略總督胡宗憲就問所以禦倭

者因出金帛餌賊首徐海愛妾紫雲始解圍東屯乍浦

又令妓翠翹碧桃蠱海乘間攻之海溺水死宗憲欲題

用固辭卒祀本邑忠義祠徵獻錄參禦倭紀事

錢貢字時雍嘉靖壬戌進士授新建知縣建置學宮調劑

驛遞僉聯稅甲里豪有圖併他人墓地者給使發塚而

陰搆其事於官坐以重辟貢廉得之重罪豪釋寃者內

擢工部主事出權蕪湖以應稅者榜示躬批籍月上之

裁抑浮費以艱歸服闋補工部郎中濬漕渠營穆陵有

功加四品服轉刑部袁志吳志參徵獻錄復參拳勺園小刻新補纂

沈鐸字東溪嘉靖時倭寇攻城倉卒被圍時鐸寓邑中僧

舍揚言曰欲退賊何必張皇巡撫阮鶚聞之奇其語訪

於鐸鐸令戶出爨釜募工鎔汁視賊圍疏處彙大木以

巨索綑給雉堞外待賊薄城則斧斷巨索聲震如雷寇

譁傳城一隅摧蟻集其下即引鐵汁雜火藥灌灑之寇

盡殲功成鶚手書退寇全城四字榜其廬薦於朝授百

戶不就隆慶間從祀宗禮祠新補纂

王胤昌字永叔父三錫見武略傳胤昌中萬歷十九年舉人授貴州思州推官陞貴陽府同知會奢甯叛據永甯永甯貴陽屬也胤昌度兵寡難拒自誓必死乃以印及錢糧冊遣吏間道歸上官亡何賊來索印胤昌焚香北拜入署縊死事聞給祭葬贈光祿寺卿世襲錦衣衛千

戶新補纂

鍾繼元字仁卿窮經博古尤精於易嘉靖壬戌進士授安福知縣擢刑部主事陞湖廣僉事清屯伍整饬政備極心力以勞成疾卒於家著有易準易原易竅易考畫前

錄渾象析觀諸書浙江通志參兩浙名賢錄

錢守之嘉靖時由掾吏歷仕至山東高唐州州同所至以

廉幹稱百姓呼為青天新補纂

施乾字一元濮院人曾祖茂永樂初以楊任姻黨遣戍武清衛父容業醫萬歷初赦歸乾少愿樸不好弄嘉靖中以歲貢授懷遠訓導遷陵縣教諭終濮州學正生平慎取與辯析名義諸弟子翕然向化在濮時監司檄署平陰縣事固辭不獲稱疾乃已陵縣人服其清介為立碑

學宮卒祀鄉賢濮川志參劉志

李樂字彥和青鎮人隆慶戊辰進士知新淦縣初謁郡守聞者驕蹇杖之而後以聞淦賦煩重乃申請畫一民便

輸納捐俸市穀實倉以備賑貸擢禮科給事中上科場積弊疏劾順天府府尹孫一正乃倚張居正爲座主者竟勿能庇復改吏科剛正不撓雖一頓一笑不以假人出爲福建按察司僉事歷江西廣西參議所至潔已愛民重懲墨吏而順昌知縣王九皋以廉被訐力爲申辨拜尙寶卿乞假歸築拳勺園奉母性儉約朝服皆以布爲之人以爲矯勿顧也居鄉留心民瘼時以利弊告司牧多改容受之未嘗一語及私直指彭應參顏其堂曰眞君子著有金川紀略見聞雜記烏青志卒祀鄉賢

通志

浙江

馮孜字子漸少孤力學性孝友隆慶戊辰進士觀政都察院授南直隸太倉州知州禁奢侈鋤豪強絕請託會倭警屬邑崇明當其衝設防守險悉中機宜內轉刑部員外郎闞校憑依把持軌法孜秉公不爲細尋以郎中恤刑江西獄多平反覆命稱旨擢河南按察司副使整飭河北兵備孜爲備芻積粟校士練兵晉福建布政使參議時流賊嘯聚廣里山負固肆劫孜出奇設伏盡殲之累升湖廣左布政使益釐剔諸積弊以清操自勵值修建大內急徵材湖廣孜瀝陳民困財細疏十餘上地方始得不擾尋以疾乞歸著有古今將略行世又有明刑

錄明儒錄要

參明史藝文志
徵獻錄新補纂

陸堦字允升萬厯丙子舉人授羅山學官却諸生餽貧者

資助之陞石埭知縣痛懲里胥積弊清節自甘及卒囊

無餘財祀鄉賢

劉志浙江通志
參徵獻錄

陸吉字謙六萬厯壬午舉人知高密縣凶歲民逃亡過半

吉蒞任未及五年招復流移一萬八千餘人開墾田七

千餘頃擢昌平州昌平地寒令民廣植木棉教紡織為

布民賴以安有守陵中官倚大璫勢擅殺人吉再揭撫

按不省竟撲殺之坐是落職璫敗以知府召不起吉性

與物多忤然諒直無污狗子孫世載其德焉崇祀高密

昌平名宦及鄉賢祠

徵獻錄
參吳志

沈蒸字華東萬厯癸未進士授亳州知州擢兵部郎中出

為福州知府厯陞應天巡撫操江都御史所至刑清訟

簡剔奸吏侵漁糧稅士貧乏者捐俸調之厯官三十餘

年田廬不踰中人猶承祖父之舊業云沒祀鄉賢

分省人物

考參

吳志

錢夢得字國賢貢之子萬厯癸未進士授鄆陵知縣擢山

西道御史厯巡陝西北直廣西按部嚴明搜奸剔弊人

呼真御史陞大理寺少卿內艱服闋起右副都御史巡

撫河南告歸沒賜祭葬子允康貢生雲和教諭

分省人物
考參

徵獻錄

夏燭字汝翼青鎮人父儒見孝友傳燭萬歷乙酉年進士
 知冀州擒治豪猾市粟備賑課最擢刑部主事歷郎中
 忤璫意謫貴陽府通判巡撫郭子章喜燭至倚為左右
 手會黎平皮林苗倡亂朝議黔楚會勦燭以皮林界連
 楚粵九股苗與之唇齒請身入九股宣威德使反正乃
 單騎深入曉諭酋長夕斲睡帳中明日令導歷諸寨卒
 感動諸寨苗椎牛立誓願納土受約束凡平寨七十有
 四得戶二千四百有奇歲徵糧四百餘石皮林失援遂
 破之泰昌初起工部郎中椎蕪湖關稅務處膏不潤以

廉平聞詩境高澹有王孟遺意

新補纂

沈思充號邃庵萬歷丙戌進士初任工部主事轉雲南提
 學道歷陞江南臬副上疏論國本宜早定再疏罷薪供
 耗費外官論事自思充始人皆壯之

吳志參桐鄉徐志

朱大雅字元渚萬歷己酉舉人知祁門縣有監生某為人
 誣訟前令以其家饒出之恐污己名獄久未決大雅至
 立釋之數日生來謁曰某有佳墨數圭欲以奉公受之
 諸子取墨磨視則赤金也以白大雅大雅召生責之曰
 我所以出汝者以我素廉謹不畏人議故也今反以相
 污擲還之入為大理評事有權關橫征者大雅疏劾

之子萬錡有傳孫彝字聲始崇禎辛巳進士

徵獻錄參
浙江通志

徽州府志

沈雲從字景日父照詳孝義雲從萬厯己酉舉人厯裕州

知州山峻險賦額荒十之三雲從徧厯山谷凡石田不

毛者繪以上聞得除額轉陳州陞池州同知殲除巨盜

二十五人所在稱循良子錫別見

吳志參桐鄉徐志

施爾志字章甫乾之子萬厯壬辰進士授太平府推官多

雪冤滯有女囚報決所攜兒號愴欲絕爾志憐之請緩

決俟兒長就法陞刑部主事累遷雲南左布政是時黔

蜀用兵滇界其中轉輸無匱卒於家子博諸生精易理

詳秀水文苑

徵獻錄

張大紳字元修萬厯間拔貢生授澄邁知縣勦捕海寇民

賴以安遷甯州知州九州道王季重贈詩云捍盜但聞

樓上鼓不貪沈盡浦中香又云堂上祇應羅烏雀車前

原不問狐狸蓋有所指也

吳志參烏青文獻

莊有翼字慎予萬厯間貢生任祁門主簿遇有上官委訊

必委曲得其情不輕施刑擢楚府長史

祁門縣志

濮師灼字見湖濮院人少襲外家姓周氏力能舉百鈞萬

懋中授廣東游擊捕盜有功進都指揮使太倉王世貞

贈詩云緩帶諸生談碣石飛書一箭下扶桑洵實錄也

新補纂

錢允鯨字長卿貢之孫天啟壬戌進士授保甯推官歷陞南京兵科給事中劾周延儒馮銓溫體仁三輔臣權貴側目遂罷官溫體仁敗詔起左江道時方用兵持論忤督師楊嗣昌乞歸所至以情慎自持

徵獻錄參吳志

陸日新字文蘭為諸生時家貧嘗拾遺金於道俟其人還之當歲薦以次名齒高讓其先貢後授本省嚴州教諭培植多士去官後崇祀嚴陵名宦祠

新補纂

陸懋元字生甫日新子天啟乙丑進士由行人歷陞黔南道監理軍務時峒徭梗化攻掠城邑設計擒其渠魁事

聞擢湖廣布政使參政降補僉事致仕歸歷官二十餘年家無贏資

朱邦祈字二元天啟乙丑進士授荊州推官內擢禮科給事中轉兵吏居諫垣六載所奏俱國家大政有清直聲

少孤奉母以孝聞

以上徵獻錄參吳志

沈宏度字公雅天啟甲子舉人性孝召漆工為父治棺長跪禮之母愛長孫為其兄子即以腴產厚分之時有盜白晝劫掠人情惴惴宏度與孔自洙潘之章大集里民兜勦佐以千總楊得功盛陳兵仗於密印寺中賊聞駭散索得數十人縛而沉諸水賊首王秀甫脫去賂當事

金將坐以擅殺宏度為戎首後得免卒後十年授衡州府推官著有五願齋詩稿容餘軒詩畏吟小草藏於家

烏青文獻

陳素字涵白崇禎甲戌進士詩文清勁有法為時傳誦知直隸開州丁憂服闋補南直泰州歲旱蝗饑僅存至題請截留漕糧賑恤待麥熟收兌有黃雲陸舜者素考校時所拔士也素後以事繫獄雲售田得百金以周其急與同臥起囹圄中事白偕出李闖陷巢廬等處即棄官歸縞衣綦巾自稱天山道人創正心書院嘉惠後學康熙時卒舜為兩浙提學使聞訃號哭至哀感行路奉其

主祀於鄉 桐鄉徐志參今世說

沈方初名士端字彥方更字大愚弱冠與兄給事士茂文名相峙依兄京邸天啟間璫焰熾甚知方名招一往見許得美官遂拂衣歸中崇禎己卯副榜授荊門州同知流賊李自成羅汝材合兵四十萬從間道至白馬渡臨江而陣方下車數日巡按宋一鶴知其才檄調赴黃陂賊左革六營自鳳皖西上犯黃安會大雨江湖泛溢方以舟師破之一鶴欲留方軍中而賊決河灌汴秦督丁啟睿師潰川兵二萬應調過荊門知州事者以疾去方乃馳還攝州事詣蜀帥勞師汝甯陷賊悉力攻荊門諸

城望風瓦解方獨據城守賊眾大至城陷方率民兵巷戰力竭被執欲降之不屈殺之家口十人同日遇害

國朝乾隆四十一年

賜諡節愍

大清一統志浙江通志 欽定 勝朝殉節諸臣錄參徵獻錄烏青文獻

金夢麒字甯所以掾吏任靈壁縣丞官滿將去值流寇攻

城甚迫夢麒守城待援兩月兵不至城潰死之又鍾廷

耀字二合亦以掾吏任廣東靈山縣丞遇難死濮川紀略

吳重光粗知書好義任俠初為衙胥眾剖與例錢告以所

自擲諸地唾曰此孽錢也安所不得一碗飯乃從地獄

中覓食耶自是絕足不入官崇禎甲申春重光挈弟往

鄉理蠶務聞燕失守棄蠶入城問京城壞然否眾曰七

日矣皇帝奈何曰與城同壞遂仰天號曰一至此乎小

人革命遙伴皇帝死足矣作數字押硯底自縊死桐鄉徐志

沈日新字銘齋天資忠孝崇禎間任南直隸采石磯巡檢

遷江西極高司巡檢解糧南畿路次九江遇左良玉兵

變被劫以刀脅從不屈旁一卒曰此義士也以計脫之

歸蔬食終身隱居不仕新補纂

國朝

沈錫原名元錫字仲韋雲從子前明崇禎癸未進士由行

人任廣東督糧道參議時疫癘盛行廣施醫藥歲饑為

粥以食餓者全活甚眾祀鄉賢桐鄉徐志

鄭禹銘字惺卿前明崇禎間貢生由餘杭訓導為清遠知

縣奉檄協勦連陽石馬等峒創造水西城垣令民開荒

土作田陞平樂同知烏青文獻

朱萬錡字潔湘大雅子前明崇禎丙子舉人順治間任德

清教諭講程朱之學為正誼社以課士士彬彬化之陞

樂陵知縣卒於官著有歸來日注惠風堂集德清縣志

張貞侯原名璣字曾元青鎮人順治丙戌舉人選昌化縣

教諭捐俸具筆研飲饌集諸生課之一月凡六舉每舉

必有擬作以示程式士風由是不變戊戌成進士授安

定縣知縣有惠政新補纂

孔自洙字文在別號行湄居士順治己丑進士任刑部主

事擢兵部武庫司時郡縣緝解梗化者繫獄矜釋甚眾

出為福建提學道王師入閩督撫以自洙才委理

軍需運礮泉州撫恤夫役人樂為用陞劍南布政參議

平巨寇吳賽娘等尋遷荆西兵備道以襄陽達武昌江

流湍悍築長隄二千餘里護民田廬湖廣通志參吳志

鄭蘊宏字雨隨順治壬辰進士任湖廣辰州府推官招撫

流移安靖盜賊督撫交章薦之內陞中書科中書吳志參桐

鄉徐志

張超字伯年順治乙未進士授江南華亭知縣縣多逋賦

里胥輒破家乃盡豁其零星細戶及孤寡殘疾者而責

於田多產厚之家以呈誤歸民尸祝之

吳志參松江府志

吳家麒字晉綺康熙乙未進士戊戌補

殿試由庶常授編修歷官禮部右侍郎以黎氏案掛吏議鐫

秩歸其官湖廣學政也絕請託勤校閱任滿籲留不獲

送行有泣下者及擢內閣學士兼禮部侍郎奉使祭告

女媧氏商王湯二陵還因陳山西應行事宜三一言穀

價久昂宜速行平糶一言驛站馬匹銀兩不專宜量照

邊馬之例一言市斗變幻不齊宜遵照制斗畫一又條

奏州縣官宜迴避與本省隣近地方又請提拿官員家

屬禁止株累婦女均

允行奉

命充

世宗皇帝實錄副總裁發凡起例紀載詳慎不愧良史材

新補纂

俞之炎字以除順治戊戌進士由庶吉士轉吏科給事多

所建白典試江西稱得士轉廣西桂林道大學士李蔚

薦其才堪大用隨征四川未行卒於家子長策長城

朱彝字聲始順治辛丑進士授靈璧縣知縣以廉幹聞不

事生產蕭然環堵讀書不輟著白衣山人集

仲宏道字開一順治間拔貢生除嶧縣知縣設祿安社招復流移禁科派絕賄賂獎節義拔孤寒不遺餘力簿書之外不廢吟咏作哀嶧吟十二章人比之元結春陵行去之日民爭留之勒石誌遺愛焉著有理嶧拙言子來

堂稿桐鄉縣志

吳志參濮川紀略樵李詩繫

周案字展臣順治間歲貢生由建德教諭陞廣東澄邁知縣改山東諸城以計平劇盜多奇績詩文自成一家有

硯華堂集子元釜衢州府學訓導

桐鄉徐志

莊際盛字茂倫更號果庵康熙壬戌進士授唐山知縣愛民禮士構椽舍于學宮以贍貧生縣故多盜申嚴約束

先後置過犯百十人於重典餘遂遁跡民感其惠肖像以祀擢吏部考功郎尋丁外艱歸行橐蕭條惟圖書數

卷而已

吳志

孔傳忠字貫原自洙孫父毓瓚奉化訓導傳忠康熙進士授山西孟縣知縣蒞任首廣積貯做行朱子社倉法著條議八則達之上官逾年晉饑境內無流離者大旱於烈日中徒行四十里入藏山洞禱雨良久有水自石罅下已而雨瀉如注歲獲稔西山虎晝攫人傳忠為文禱山神約三日盡驅去屆期果屏跡署平定州事歲稔先發倉煮糜食飢而後詳請全活無算時汾州奸徒希侵

賑帑報飢戶多不實而介休尤甚上官卽檄攝其篆舛刑具身歷堡聚不法者輒懲之或豪戶閉糴密察罰賑時朱文端軾司賑三晉獎傳忠賢能第一調洪洞洪洞富庶冠山右舊例縣令日用所需悉取諸民傳忠至盡給價設簿記數俾吏役無影射縣壤接趙城有渠出兩邑間居民互資灌溉趙之勢家遏之使勿洩遇旱禾輒稿乃聞之上官卽日具畚鍤督疏濬置鐵閘劃其界永禁之擢知解州前後歷官十年民稱真父母

烏青文獻

吳志

唐令揚字間崖青鎮人附監生爲祭酒曹禾司業彭定求所知撥廣業堂肄業尙書徐乾學亦雅重之尋入甯紹台兵備道胡承祖幕時江蘇獲劇盜張廿一供稱有老營屯大蘭山大吏檄令進勦乃先滅從偵探至則井里熙熙匪徒絕迹山毗聞兵來思甚及撫諭訖皆焚香蒲伏慶更生巡撫嘉令揚材略禮爲上賓

新補纂

州知州州濱海南郭支河為潮溢築堤障之尋以長安時賠案罷官

世宗御極特超授廬州府知府旋陞蘇松常鎮太督糧道五府州糧儲甲天下奸弊莫能究有溫鐵匠者善造斛便吏浮取訪而斃之法老奸宿蠹盡收之眾始大快徵糧時乘小舟微服雜農民入倉廩或突陞廳事呼召倉中人飲食寤寐間惴惴若景夏臨其上造小口斛定尺寸制度上其議不果行後十餘年各督撫會議得旨準用其式鑄鐵斛十一一存部餘頒各省畫一改造通行至今民稱小口斛為馮斛陞安徽按察使歷都察院副都

御史刑部左侍郎告歸景夏丁文章善寫山水頗自矜重不輕作子錦鈐錦宜川縣丞以子 贈編修鈐有傳

大清一統志參畫徵錄

沈家鶚字翰逸以進士除雲夢知縣有水患請移漕賑濟巨寇高玫聚眾劫掠獲其魁餘黨解散旋以疾告歸吳志俞長策字御世號檀溪幼力學醇謹寡言笑於書無所不窺以五經

特賜舉人康熙丙戌會試被放

聖祖問大學士李光地曰舉人俞長策會榜無名主司之不明也明日總裁官俱削職長策得一體

殿試授編修充講官識錢文端陳羣於諸生時妻以女嘗語
 經義須貫穿融會毋徒似應舉業者就訓詁敷衍成文
 而已典四川陝西鄉試卒於官有詩文集六卷弟長城
 字甯世號硯園乙丑進士官編修文章簡勁修潔朱檢
 討彝尊稱其近曾南豐假歸貧甚杜門撰述所著詩文
 及評選經傳制義為學者矩矱吳志參香樹齋文集
 施德涵字淳如康熙丙戌進士知鉛山縣捐俸建鷺湖書
 院又脩祝公橋邑人頌之合祈雨禳虎二事為治鉛三
 善屬海甯查慎行輯志查詩云指點鷺湖榛莽路講堂
 片席待重開蓋實錄也烏青鎮志

汪森字晉賢康熙間恩貢生授桂林通判桂林多人才創
 義學延名師獎勵之歲飢平糶不足則捐俸以濟時三
 省合勦衡靖二州賊森隨營監紀偵得賊首馬奇三等
 竄入生苗乃率軍倍道以進經伶仃雞心諸險隘陟龍
 勝鷺灘圍攻于龍坪寨賊盡匿苗峒復密伺至三沖
 誘之出戰奇三中石死餘黨馬之駙等皆就縛移判太
 平擢知鄭州旋陞戶部江西司郎中致仕所著有小方
 壺詩文集粵西詩載文載叢載等書曝書亭集
 沈滉字潞公歲貢生授象山訓導象山僻在海隅其士誠
 樸未諳禮法滉進而教之三年病卒諸生聚哭奉含殮

視之猶父云

烏青文獻參
攜李詩繫

施鈇字階五授雲南趙州州同時吳逆倡亂督撫留鈇軍中傳檄運餉悉稱職已而赴任

大兵奏凱供應不乏尋攝姚州州向為逆賊馬實所據百姓流亡殆盡城內外不滿百戶多方招徠雜派差徭盡免之半載後稍集至三千戶所轄普湖地最衝要且崎嶇山路往來支給尤艱鈇晝夜奔馳不少怠以疾歸

烏青文獻

楊瑄字自崑號栗齋康熙五十五年以國子生充圖書集成館分纂雍正五年任柏鄉知縣居官廉正去之日縣人肖像祀之遷江甯同知卒于官

伊志

屠嘉正字時若高祖應韶明直隸新樂縣丞以廉直聞世居秀水嘉正始籍桐鄉雍正甲辰進士由刑部員外郎出知廣西太平府鄧橫蠻抗逆官兵進剿嘉正參贊軍務親冒礮矢屢出奇挫之進攻圍擒三策統兵者不能用數移書督之遂與齟齬歷十月事始竣敘功不與思明土官黃觀珠請以五十寨歸流土民乘機為亂議者欲發兵剿之先奪觀珠職嘉正馳啟督撫止兵單騎往曉以禍福解散其眾密購首犯寘之法不逾月事遂定改山西大同府遷福建糧道以母憂歸服除補湖北荆宜施道江漢水利督撫悉委統理凡荊州安陸襄陽德

安四府隄工千餘里並以時修舉前後條議數萬言悉中肯綮尋擢貴州按察使改貴東兵備道引疾歸著怕齋集別集共十六卷子洪緒字葆和國子生性慤實事親得歡心讓舊宅於諸從兄弟人稱長者以子仕 封

教諭卒年八十一

大清一統志廣西通志參諸錦絳跌閣文集

朱元豐字端可雍正甲辰舉人保舉清查江蘇逋賦署華亭縣海水泛溢漂溺民居元豐集僚佐及諸幹吏分路救災疏積水勢既平乃捐俸施濟民困始蘇徵漕舊例民米入倉後欲得執照甚艱苦元豐乃創造由單挨戶分發納米之後即付執照得詳請著為令調金壇縣在

任七年凡縣人姓名狀貌及人之臧否過目不忘聽訟

以息事甯人為本疾乞歸

金壇縣志

李肇開字雨蒼號綺軒雍正癸丑進士授戶部主事改知孝義縣洞悉倉糧為民累力清其弊在任無赫赫功去

後人輒思之

孝義縣志

陸大德字虛中襁褓時受撫於舅氏王既舅氏妾生子大德決意歸宗侍奉本生母舅氏分貲與之辭不受以貢生授錢唐縣學訓導一夜有少婦踰垣入自言為某秀才妾嫡害難堪逃避至此某生巨富也吏胥遂獻計謂可獲重貲大德立召生至令昇歸却其謝大吏檄查合

郡銀舖終其事一文不染升南直隸鳳陽府教授子彪

順治六年進士由廣東韶州府知府游擢至雷瓊糧儲

道卒祀名宦鄉賢兩祠孫煒另有傳新補纂

陸煒字視三諸生雍正六年保舉發往廣西署懷遠縣界

接黔之黎平苗民雜處有都江亘數百里苗專利販運

賈船無敢輓而過者煒曉諭之悅服商販得通改駱容

運江河波流湍激民素病涉造船以濟授灌陽調天河

水陸多險隘相度形勢設郵亭置渡筏百姓利之擢南

甯府同知舊例理鹽務委役設舖雜私鹽以鬻於民官

吏驚此為利藪煒以官行私販不可亟辭之題陞思恩

軍民府乞歸烏青鎮志

陸費熙字廣颺保舉任長山知縣夏積雨孝婦河溢晝夜

巡視登城防築民田廬沒水中無以存活卽發廩賑之

或謂須俟詳文轉者曰俟詳文轉則民餓死久矣有勢

家奸僕婦毆僕死廉得置于法被劾歸伊志

王應綵字湘亭雍正庚戌進士授刑部主事歷員外郎任

事久諳習律例凡重案難決者上官悉屬之典廣東試

擢江西道御史督學河南母憂服闋補湖廣道御史遷

禮科給事中有清慎堂奏稿伊志

宋文瀾字訥菴監生雍正中援例為福建崇安縣知縣縣

吏相比為奸如勻丁浮額受賄抽免私刪比簿移入無徵有收欠催詭名首墾之類弊竇叢出文瀾悉釐正之

采福建通志

汪廷英字掖清父繼燦詳秀水列傳廷英附貢生循例授仙遊知縣旱災發倉平糶貧民攜斗升春食并為贖治溢量與之既而穀耗五百餘石捐俸以補旋陞興化同

知署府事以疾歸

伊志

汪筠字珊立廷英弟附貢生循例授光祿寺署正出為安西同知安西今為直隸州時方為府故事歲未登民得借官粟至秋完倉時上官不許筠力請得如例遷永北

知府獄繫囚三百審理兩月釋者過半署廣西府寶月關路難行捐俸平之筠工詩善畫為錢侍郎載所稱著有謙谷集六卷

伊志

朱沛然字霖齋本李氏子幼育於朱從其姓乾隆丙辰五經進士知高安縣三年不名一錢以病告攀留者趾相接瀕行父老灑泣道左有署其政事徵詩歌曰天池集既卒無子家貧甚一妾能守志以終焉

伊志

陸世琛字卿田父忻清遠縣知縣廉隅峻直以計典罷歸授徒自給學者宗仰世琛中乾隆十五年舉人由臨海縣教諭改授河南密縣在密治行稱最子元鉉字冠南

乾隆丁未年進士官禮部儀制司主事擢員外郎放四川雅州府知府調署甯遠府川陝教匪滋事避亂者踵至悉收納安撫之其地產蠟蟲負販者雲集謂之蠟蟲會是歲有匪徒乘間竊發元鉉捕誅首惡民遂貼然後補廣東惠州府知府惠州地濱海土匪又熾元鉉甫抵任賊攻歸善縣盤沿汎礮臺已掠礮械去方設法追捕而賊又從他道至急督兵勇發槍弩殪多人賊乃遁調高州府知府被議鐫秩歸子瀚字詞瀾嘉慶甲子年舉人大挑補花縣知縣值水災捐俸施棺木散糗糧設粥廠貸籽種民得全活旋以老乞休不能具歸裝寅好賞

助之乃得歸

新補纂

馮鈴字咸六乾隆丁巳進士授吏部主事歷刑科給事中出爲福建學政改貴西道累擢湖南巡撫調廣西東蘭州徭人蒙蓬等與覃姓讐殺拒捕匿山箐鈴率田州土司岑宜棟以兵深入村峒峯嶺陡峻鳥道盤空鈴令童僕裹糧盛水駐營山頂盡獲蒙蓬等其無辜婦女給鹽米釋遣之南甯巨窩古玉璇者自左江至潯州結朋黨肆行竊劫嚴飭有司購獲境始得安旋調安徽尋給按察銜罷歸卒於家

伊志

鈕汝騏字駕仙乾隆己未進士官編修幼卽刻苦於學研

究經史里中諸老宿咸詫為異才受知於邑宰姚述虞
 姚籍順天及官翰林春秋祀其墓著有南雅堂全集伊志
 徐錦字念祖乾隆乙丑進士授山東蒙陰知縣歲稔民疫
 施藥及棺槨煮粥食飢者尋降調歸丁丑

南巡迎

駕給原銜性篤孝母疾割股以進所著詩文若干卷藏于家伊志

吳瓌初名襄字駕璜性誠篤事母以孝聞瀏覽經史善屬
 文尤工於詩乾隆己卯舉人授中書充

武英殿纂修官歷陞內閣侍讀清慎自矢劉文正統勲極器

重之伊志

馮浩字養吾乾隆戊辰科翰林擢監察御史壬申春充順
 天鄉試同考官秋充會試同考官丙子江南副主考其
 拔士也公慎不苟窮日夜力搜羅恐不及故得雋者多
 通才宿學在詞館十年清望資深纂修續文獻通考精
 加纂敘純孝性成侍養極盡心力丁母艱心疾屢發養
 疴在里四方慕其學行多所造就不專尚文藝必以厚
 風俗敦儒行為諄諄故文名清節並重一時乾隆六十年
 重赴鹿鳴宴封鴻臚寺卿卒年八十有三入祀鄉賢祠
 刊有孟亭居士詩文遺稿于志
 沈啟震字位東乾隆庚辰舉人已丑中正榜由內閣中書

軍機處行走陞刑部主事員外山東運河兵備道護理
河督運江南河庫道加按察司銜爲文瑋瑰宏麗歷官
中外矢勤矢慎廉潔自持尤熟于河務相度捍禦動合
機宜

純皇帝東巡時屢邀

褒諭以勞瘁卒于官前居鄉時爲烏青兩鎮創立分水書院著

有慎齋詩集于志

蔡封字桐封乾隆辛巳進士授四川夾江知縣丁憂服闋
補丹徒程伊川福歲久荒廢祠旁地爲豪猾所侵清理
之且修其祠鄰縣有私鹽拒捕案牽累數百人節府檄

審理乃貧民肩挑餬口不在禁例者懲首惡而釋其餘

陞遵化州歷正定府知府歷官二十年清操如一日伊志

濮啟元號玉巖乾隆癸未進士授來鳳知縣調灌陽培植

多士捐俸修葺學宮民勒石銘其德引疾歸伊志

趙珮字玉亭由太學揀發雲南通判署大理寺通判兼攝

劍川州知州會地震屋宇傾圮兵民壓死九百餘口珮

奉檄辦災悉心賑恤民夷悅服累陞開化府知府後以

病廢卒於家新補纂

陸費桴字丹叔乾隆丙戌進士授編修提調四庫館奉

旨陸費桴承辦四庫全書頗能實心勤勉且其學問亦優著以

翰林院侍讀陞用洊陞詹事府少詹充

文淵閣直閣事歷代職官表總纂官擢禮部右侍郎充四庫全書副總裁丁母艱歸以前所辦書有應撤毀者未經奏明落職平生閱覽博物凡彝鼎圖書碑刻縑素過目即能鑒別堪輿醫藥陰陽方技之術靡不通曉著有枝蔭閣詩集頤齋賦稿經典同文等書

伊志

汪大鏞字鳴盛由雲南曲靖府同知調景東以銅廠虧帑事被謫尋起官直隸廣平府通判遷東路同知值歲飢遵化永平貧民竊海灘鹽與營兵鬪鎮將以謀變申總督幾興大獄大鏞往諭分別懲治得無事冀州隆陽河

決前州牧擁民夫護城鏞至急撤夫築堵決口歷四晝

夜隄成

新補纂

金樟字匡秀以廩貢除樂清訓導旋聯雋成進士授內閣中書歷工部主事陳尚書誥嘗謂人曰曹屬得金主事吾儕主畫諾可也已而聞母病乞歸服闋遂不復出平生謙和樸實如賑荒給楛及修學宮立義塚諸事悉傾貲經理無怠心亦無德色家富藏書有文瑞樓書目所著南廬詩文集共十六卷

伊志

金宏勳字元功樟子附貢生保舉發往四川署雙流縣縣為川南孔道長運打箭鑪餉米民勞費重宏勳請於府

得產米州縣分辦自是雙流僅短運五百石公私便之
旋授安岳調巴縣擢安徽六安知州創書院士風日起
以福建汀州府知府致仕

伊志

金烈字揚武樟子入資爲戶部主事歷遷吏部文選司郎
中擢廣東惠潮嘉道潮之海陽東廂都隄禦汀漳嘉應
三府州之水以衛海澄諸縣前經請帑築防未及蔡家
園水至輒淹烈履勘得險狀捐俸添築民得奠居惠屬
之龍川和平二縣爲江西定安下游商人欲便運販謀
開大渠喉贛南當事議聞兩江制府烈往相度謂此渠
一開則壑我龍川和平矣繪圖陳利害力言不可事得

寢調糧驛道卒於官

伊志

程尙贊字北涯貢生授南昌通判遷饒州同知分駐景德
鎮裁省冗費通商惠民署瑞州吉安九江贛州府事有

治聲擢建昌知府

伊志

程同文原名拱號春廬晚號密齋乾隆庚戌

東巡召試

欽賜舉人嘉慶己未進士由兵部主事充軍機處章京歷官員

外郎大理寺少卿奉天府府丞提督學政道光三年乞

休回籍卒于濮頭鎮舟次著有密齋文集密齋詩存行

世又元秘史譯元史譯音地理釋職方圖等書

于志

馮應榴字星實浩長子幼秉庭訓績學砥行乾隆辛巳進士乙酉

南巡召試

欽賜內閣中書軍機處行走主湖北山東鄉試提督四川學政

累官光祿寺少卿通政司參議鴻臚寺卿江西布政使

護理巡撫別歷中外懋著政聲有註釋蘇詩行世志

馮集梧號鷺庭浩少子乾隆辛丑進士授編修出典雲南

鄉試得士最盛丁母艱回籍主安定雲間書院獎勵後

進孜孜不倦註樊川詩集行於世志

徐夢麟字振公由夏邑典史累陞淡水同知值林爽文亂

城陷前同知程峻死之夢麟速赴任所集義勇恢復之白石湖金包裹民集黨交關羣聚山上官兵疑爲賊欲攻之夢麟廉得其實遣邏卒招之下山示以恩信數日間男婦就撫者數千人已而傳賊兵復至乃發兵南下中途陷入重圍與賊死戰破圍出會大將軍兵至馳至大甲溪結營溪口招募義民番兵數千人督將弁分路進勦遣義民密結生番資以布匹鹽菜使伏內山截其衝突殺賊黨何有志通道六百餘里招降數十萬人遂擒爽文而臺灣平夢麟以軍功蒙

賞戴花翎擢泉州知府署興泉永道因署閩縣時交代未清被

議落職歸

伊志

嚴廷珏字行之號比玉青鎮人祖大烈見孝友傳父寶傳見義行傳廷珏生而穎異以廩貢援例得雲南同知歷權署我保山易門阿迷大關臨安澂江各府廳州縣補授雲南府同知陞知麗江府調順甯府兩督銅運入都考最以道員注選卒於任宦滇有政聲道光甲午官大關值歲飢乃不待報發倉廩六千石以賑而自捐價繳糧道庫咸豐初官順甯土司有謀奪承襲者暮夜餽金珠值鉅萬堅卻之以應襲上永昌為滇膏腴郡方奉檄之順甯時有某制府屬私人授意當得量移斥弗與坐

是歷任多瘠區至傾家以償官逋勿悔也生平豪飲精詩座客常滿而外和內介人不能干以私子三幼謹入

忠義傳女三幼澂華入孝女傳

新補纂

馮津字綺季鈴子自幼好為詩習騎射倜儻自喜以布政

司經歷銜署靈寶縣調盧氏聽訟明決母憂服闋効力

河工題授東昌府下河通判擢雲南劍川知州

伊志

陸費元鑽字小愚侍郎墀子官直隸天津縣知縣設救疫局墾荒蕪田培植書院士子遇有親老者未婚者膏火加獎推鞠案件不事敲扑必得其情獄竟無冤死者嘉慶中衛輝大水鄉民逃亡至天津元鑽傾橐哺之並躬

護以歸爲壁畫田廬溝澮而後去鄉民數百家並立主
祀之光緒二年奉

旨入祀直隸天津縣名宦祠

新纂

周楨字愚堂諸生拱辰七世孫同懷五人友愛無間嘗赴
省試聞兄某病歿常山卽罷試馳往載柩歸與弟楚弟
幹尤知名慕望溪方氏昆季同穴事遺令合葬楚字萍
江劬學勵行所著壹主於詳實嘗纂補帝王年表

國朝信史年表嘉慶中以例貢官常山訓導幹字古軒學易
三十年成易庸一書大旨主濂溪而不爲苟同於宋易
頗有得所著又有四子書說約讀書管見願赜錄等書

周士炆字敬修以附生入資選江西瑞金縣瑞林寨巡檢
同治三年八月賊犯南雄士炆團勇潰被賊脅降取零
丁紙授士炆屬疏入粵路程士炆罵不執筆賊支解之
並殺其幼子善信士炆妻黃氏自剄死事聞

恩卹如例

新纂

周士燭字鐵霞弟士炳字蓮史少同學長同試道光庚子
同舉於鄉嗣後同官京師士燭授內閣中書分校方略
博綜掌故截取得府同知未赴卒士炳乙巳翰林官編
修咸豐戊午充順天鄉試分校卒於闈

新纂

陸以滌字定圃密縣知縣世琛孫中道光壬辰舉人丙申

進士以知縣分發湖北奉親抵省甫數月父元錚慮仕途嶮巇時有憂色卽承志改就教職選補台州府學教授丁外憂服闋補杭州府學教授以母老告歸歷主分水近聖及杭州紫陽書院講席衡文清真雅正士皆化之卒祀鄉賢

新纂

嚴謹字叔和雲南順甯府知府廷珏子由縣丞投効貴州軍營歷署清鎮縣知縣郎岱廳同知正安州知州興義思州石阡等府知府任清鎮時粵匪石達開陷廣順謀竄清鎮謹率團勇保禦知興義府適石逆犯郎岱城率眾登陴城圍立解於時土匪易飛雄結苗屯踞老黃山

復選壯士夜襲焚其糧賊驚遁俄調署正安州又調署石阡府知府賊憚謹有備不敢犯同治四年五月會天大雨賊冒雨薄城城陷謹巷戰中創死事聞贈太僕寺卿銜予雲騎尉世職謹族兄誠隨謹陣亡並卹蔭如例

新纂

金鶴清字翰皋廣東嘉應州知州錫鬯子道光二十五年以一甲二名及第授編修明年充貴州鄉試正考官道光三十年咸豐二年並充會試同考官尋記名御史入直南書房四年卒鶴清少貧困嘗喬居嘉定姑蘇善作文時爲人傭筆墨旣官京師益嗜學手點勘羣書於晉

書尤力詩亦工著作見藝文新纂

陸秉樞字眉生道光丁未年進士選庶吉士授編修歷官山東貴州江南諸道御史轉給事中巡視中西兩城充乙未會試同考官卒贈光祿寺卿銜其在諫垣也有言內務府召民間優伶演劇者疏劾近習藉端獻媚大臣不知匡救語甚切至福建邵武府城陷於賊守將逃避昌言講諫中西和議成極言夷情叵測又疏諫京師設立夷館又再疏諫巡幸木蘭及請復京倉舊制請懲餘姚奸民請禁候銓官假稱親老告近與議團防獎忠節劾貪吏諸疏言皆切直有古諫臣風新纂

陸費瑒字春帆直隸天津縣知縣元鑛子由副貢生充國史館謄錄議敘知縣選授湖北麻城丁艱服闋揀發直隸其初入讞局也會審捕役馬得山聯鈎扎傷李庚一案刑部載入駁案新編補東強辦蝗災與文教調清苑值征張格爾兵差禁絕官價名目升易州恭辦

陵差暨

成廟萬年吉地興工支放辦道夫價賞給間架銀兩嚴絕剋扣戶婚田債案件即令原告傳喚被告不出殊籤不交管押升正定府脩防滹沱河險要詳定讞局結案期限調保定府並以幹練稱尋擢臬司升廣西藩司調直隸查勘天津所屬新城葛沽鹹水沽附近海河

可種地令民開墾道光庚子賑濟天津水災設粥廠施
 棉衣借給籽種採買雜糧活民數十萬民追感元鑽舊
 德遂播大小青天之頌尋擢湖南巡撫時耒陽縣民楊
 大鵬等糾眾為亂瓌抵任親督兵赴衡州分據要害杜
 賊傍竄大鵬就擒舊制綠營兵只演弓劍刀矛瓌令兼
 習鳥鎗於例操外增設月操親自校練各屬溢額典吏
 凡九百餘名疏裁之永杜冒充祁陽會匪王棕獻滋事
 捕誅之湖南民猺雜處每有匪徒結盟拜會乃嚴行保
 甲法並究出傳教之王存真楚潮泗等拿獲新甯猺匪
 雷再浩乾州屯田痞匪石觀保屯田類皆瘠土各佃不

敷養贍藉此痞苗煽亂奏請酌減得

旨豁除八

千四百餘石又疏覆部議銀錢並重章程及禁漕務情
 弊均稱

奉 命在籍督辦捐輸團練事宜得優敘未幾卒

光緒二年奉

旨父子同祀直隸名宦祠

新纂

姚學蘇原名學韓字小蘇由副貢生中道光甲辰年舉人
 大挑知縣分發四川未到省殉粵匪難於直隸滄州事

聞贈知府銜予雲騎尉世職

新纂

曹鏜字金坡監生成豐十年粵匪陷嘉興鏜與同里舉人
 畢槐等創辦團練禦賊於萬年橋受重傷昏仆於地及

嘉興府志 卷六十一
晚鄉人昇至茅舍中越數日卒子桐溪三德均遇賊被
擄不屈連袂躍入殺人浜而死

新纂

沈如潮嘉慶庚午舉人官滄州知州治尚清靜喜文士不
通干謁歷事明察書吏不敢弊文咸豐三年九月賊陷
滄州冠帶罵賊死眷屬同殉難者十三人

兵燹錄
新纂

金錫鬯字和號菴穀烈孫嘉慶辛酉拔貢戊辰舉人以
校錄會典議叙選授廣東恩平令尋權廣州府澳門同
知所司多大小兩西洋番舶貿易事絕苞苴詰姦慝在
任四年重洋帖然擢嘉應直隸州知州值歲饑輕騎編
查嚴懲剽掠急碾常平倉穀六千石平糶屬縣長樂獲

解疊劫盜犯八人廉得寃者昭雪之大府以平反巨獄
入告得

旨加知府銜旋引疾未歸遽卒於粵嘉應民醵金建祠子鶴清

另有傳

金氏清芬
錄續補

吳霑字時濟號東溪青鎮人家以力穡育蠶致富霑爲人
篤厚慷慨見義必爲兄弟三人季出贅俗於贅子析產
必視諸兄弟有差霑請三析均之家有塾規延師誠敬
以故造就皆有成至館師相與不忍去稱貸償不如約
者聽之母許子弟急索逋嘉靖丙辰詔採天下鉅材供
營建邑令金燕知霑可任以意諭之霑卽慨然應命邑

故無城始築時北水門勢衝激施工最難霑身任之務
 為堅久告成不踰月而倭寇徐明山葉麻等擁眾萬餘
 人圍城多方攻北水門弗能入在城生靈係全無算金
 燕歸功於霑上之巡撫阮鶚大為加獎他若陡門萬壽
 山寺為東坡三過舊蹟青鎮壽聖寺浮圖皆霑首倡捐
 造人咸頌之屢舉鄉飲賓年八十餘卒

案霑明人今據李臨川拳勺圍

小刻補纂

吳慶培字晉康青鎮人寄居江蘇震澤縣北麻村慷慨好
 施予有幹濟才咸豐庚申粵賊陷蘇垣遠近騷動慶培
 以候選州同奉大府檄團防捐餉督帶鄉勇八月十八

日賊隊自北麻漾進泊村橋門自朝至暮血戰終日力
 盡被戕由江蘇巡撫奏請卹贈知州銜

新纂

陸三元字塋泉屠甸鎮人咸豐十年八月賊至鎮西市三
 元率團勇拒戰手刃數賊賊愛其驍勇勸之降三元怒
 罵曰死則死耳安能供賊驅使耶賊拉殺之

新纂

徐順居屠甸鎮小馬亭子善放火鎗咸豐十年八月賊犯
 屠甸團勇某邀順相助搏戰於萬年橋順每發一鎗輒
 斃數賊賊手槍如牆而進順中創死

新纂

明 濮圓齡字侍涇濮院人宗淵五世孫為人倜儻多才兄弟
 友愛知縣胡舜元表所居曰人和坊卒祀孝弟祠新補纂
 鍾名遠正統七年歲饑出穀麥一千六百七十餘石助賑
 事聞敕獎建坊同時有王全顏小童王顯保捐粟賑饑
 朝廷勞以羊酒旌為義民復其家三年吳志參桐鄉徐
 鳴遠與孫佐播壁志案劉志作
 合傳列入平湖
 濮宗淵字魚樂景泰中旱宗淵發粟五百石募役濬河以
 便行舟宏治中大旱復捐米千餘石自南幽河濬至運

孝義

明

濮圓齡字侍涇濮院人宗淵五世孫為人倜儻多才兄弟
 友愛知縣胡舜元表所居曰人和坊卒祀孝弟祠新補纂
 鍾名遠正統七年歲饑出穀麥一千六百七十餘石助賑
 事聞敕獎建坊同時有王全顏小童王顯保捐粟賑饑
 朝廷勞以羊酒旌為義民復其家三年吳志參桐鄉徐
 鳴遠與孫佐播壁志案劉志作
 合傳列入平湖
 濮宗淵字魚樂景泰中旱宗淵發粟五百石募役濬河以
 便行舟宏治中大旱復捐米千餘石自南幽河濬至運

塘水得以不涸當道獎之

桐鄉徐志參
濮川舊志

張鵬字九萬少孤依兄鸞不析髮鸞侷儻負氣坐徭役破

家卒鵬食貧無間言謹事孀嫂如母每出懷果實歸命

妻擇佳者先以奉嫂始終不怠以醫寓石門鎮嘯咏古

今陶然自適陳刑部謨狀其行事

桐鄉
徐志

朱霧字元沛好善樂施倡義築城捐基立學捨地為塚郡

邑嘉獎給冠帶舉鄉飲賓

伊志

徐梗千金鄉人嘉靖二十三年捨田一百五畝于學宮以

濟貧士是年荒復出米一千石賑饑邑令徐麟獎其義

萬曆二十三年子懿復捐貲三百金米二十石修學邑

令陸錫功亦獎之

桐鄉
徐志

陸明字晴川家素饒嘉靖中再經倭寇室廬盡毀見遺金

于廁俟其人還之子吉有傳

伊志

張鯢清風鄉人孝友忠直遇事正言相解不徇人以非禮

桐鄉築城捐資助工邑令金燕高其義獎之後屢舉鄉

飲卒年八十三

袁志參桐
鄉徐志

沈瓚捐資三百餘創建儒學尊經閣

莊儒萬曆四年縣治廳將傾知縣高梅議需四百金重修

儒獨力捐之

以上桐
鄉徐志

鍾澣字望之好施與每遇歲歉捐米助賑萬曆初給冠帶

建善士坊表之子槩字異泉考選中書能守父訓舉鄉

飲賓

伊志

甯冠性至孝祖母疾醫藥弗能愈冠割股肉以食之朱杲

字景陽號南松諸生母患心疾杲割股救治大吏俱表

其孝行

伊志

錢夢傳字季良夢得弟父宦歿長安扶櫬歸里人謂樞在

外不宜入門夢傳曰父死不及視含殮又不得成喪禮

於敝廬於心何忍遂迎入堂哀毀盡禮以子允鯨貴贈

官

吳志參桐鄉徐志

陸天錫庠生天性至孝惟以順悅二親為心父母病篤家

居侍湯藥不應省試後父母相繼歿天錫日夕悲號致

疾卒邑令表為孝子

桐鄉徐志

鍾啟明字思梅性孝友讓產於其從兄邑城圯捐資助築

萬厯間歲荒煮糜賑饑全活無算

袁志參桐鄉徐志

錢汝追字元同由諸生入太學工詩古文辭居家孝友歲

饑發粟賑濟里人德之

湯日新諸生少有至性父歿廬墓側遺資悉讓其弟弟歿

代償積逋數百復撫遺孤

葉應乾字敬川敦行孝悌言色不苟為時所重歲饑捐粟

煮賑又創同善會設義塚瘞露屍無算學使者表其門

以上
吳志

邱璣字怡竹萬厯間歲歉出粟賑饑全活無算獨建含山塔修造本里鳳儀寺橋七十二座廉使閔珪為文勒石以紀其事伊志

邱珊字世重正德時貢生官福州州判家饒於財歲饑盡散賑鄉里時寇盜充斥相戒無入邱善士門新補纂

諸董威字雲芝事親極孝養性好義嘗捐數十金創新安將軍祠與里之慕義者置田使僧供灑掃廟以不廢伊志

夏伯號澄村性寬厚人有遺金于道驗數還之一日偷兒入室獲之乃鄰人子密遣去并周之卒改行成善人曾

孫開先字禹承克紹祖德以所受祖宅讓于伯兄又捐

己產以償公堂積進順治辛卯寇盜充斥慨然以保障

自任一方賴之伊志

仲應鶴字九霄性至孝萬厯末母周氏病割股肉為羹以

療張昭字允昭年十四父病危篤割臂肉一臠以進漸

愈秘不與人言至孫曾始述其事桐鄉徐志參
烏青鎮志

沈祐字天佑早年失怙事母不違色養母邁疾嘗藥滌臉

顛天身代比執喪哀毀盡禮日暮不離殯側蔬食水飲

至毀瘠罔變督學徐某獎之兩姊早寡子竝幼撫恤無

間孤姪繼儒繼經方脫襁褓教誨鞠育逾於己子後二

姪竝餼邑校幼弟禧病八載親視湯藥無倦色後不起則又存恤其家俾弟婦邱賴以守節

見聞雜記

鄭輿誦字覺初天性至孝語言色笑無不曲承親意中歲喪母事後母無異所生已而親故棄產營祖父宅兆四壁蕭然不顧也舉止端凝不妄發一語後學奉為典型

著作多散失

烏青文獻

邱雲字季心館穀以養親崇禎庚辰歲凶越三載弗稔貧益甚時父已歿母尚存雲旅食念其母未嘗飽每數日弟來告匱雲竭力經營俾得歸以養母又捐所食之半以食弟主人聞之益殮飯必辭蓋不忍弟之不食而去

而又不欲以弟之故累人也

言行見聞錄

毛文耀性孝友父病籲天請代委曲盡色養崇禎甲戌學

道黎元寬給匾嘉獎

桐鄉徐志

朱杲字景陽諸生母患心疾求醫不效割股肉救治

張王謨字文甫性孝友八歲喪父哀毀如成人後喪母再期猶嬰嬰啜泣兄王道早卒待寡嫂陳氏如母朝夕必

簪履束帶以見

以上新補纂

夏儒字良聘號雲泉事父母孝視膳嘗藥有恆度弟妹俱幼撫育成立會族有恃橫阻其父葬事者置酒會宗人涕泣跪告舉座泣橫者亦感悔居鄉不談人過不立崖

岸間為解紛是非斬然不爽客醉忘金去封檢如故悉返之既以子貴受封不輕乘軒謁郡邑延舉鄉飲賓輒辭之烏青鎮志

沈照字日亭自幼孝友長而好施尤潛心理學學者奉為師範以子雲從貴贈奉直大夫桐之士請于督學祀于

鄉桐鄉徐志

張明俊號九芝庠生遇人吉凶曲意周恤不計有無弟子家貧不受其贄嘗出見故家子逋賦被械代為之輸袁志

陳國紀崇禎十三年捐田十一畝作義塚時疫癘大作復偕朱茂曜僧岸然韻石遍拾尸骸所埋不下五千云邑

令張如戴祥請免糧以獎其義伊志

李成德憫族貧讓產贍之崇禎末年饑出粟助賑里人感其義吳志

葉維幹字始元明季與兄諸生維翰並隸復社有雙溪二葉之目屢躋省闈獨守遺經為士林模楷三以鄉飲禮

薦卒不赴烏青鎮志

邱顥字伯岳躬耕事大父及父父歿資其弟三人讀書不替家學孝友純篤稱於鄉言行見聞錄

錢濤字飛雪監生集同學醵金葬師某戚姚黃卒於京師撫其孤子女長為婚嫁新補纂

濮龍錫字九上諸生喪偶不再娶讓產於兄子濠好讀左氏春秋肆力詩古文詞歿後貧無以殮當事者高其義捐俸以賻與妻呂氏得合葬武進士俞京為撰義夫傳知府閻若琛表其墓曰隱君子新補纂

潘仰歲字星河陰行善事順治丁亥年屆九十邑令楊駿舉鄉飲賓問以為治之道答曰惟願民之父母無私好惡已耳及百歲邑令王好仁復舉鄉飲表其廬曰厚德無疆壽一百一歲桐鄉徐志

國朝

徐衷泓字心水弟沅字生一陳常字時夏皆諸生鼎革初

羣盜蠡起劫掠村落間三人仗義糾眾與盜格鬪陷入盜穴皆遇害盜退三人之婦輿尸歸刀痕滿身聚哭暈絕而甦拮据殞殮守節終身四貞紀畧

鍾聲閻字青雷父廷耀官靈山丞畱欽州旁城島罹寇難死聲閻悲痛終身發為詩文多沈鬱慷慨隱居濮院以

課徒終楊燮勛亭文鈔

沈樾順治間父病藥治不效樾割股肉和藥病愈母患目疾樾以舌舐目復明邑令劉永吉書額獎之袁志參桐鄉徐志

周起龍睦族敦里順治三年歲饑斗米三錢起龍捐米二百石半價給散鄰里從子應驊路拾珠髻訪還之桐鄉徐志

濮淙字澹軒順治初室遇火入煙燄中扶二親以出耽詩

好友有半間樓浣雪居月巢蘧園諸刻人多購之樵李詩繫

鄒璜字待聞幼事母孝能急朋友之難順治戊子舉人選

仁和訓導修學宮及琢玉亭較藝其中從遊者眾卒祀

鄉賢桐鄉徐志

陳有仁字振所慷慨好義積有善行順治五年邑令張鳳

羽十六年郡守劉啟復給匾表其閭屢舉鄉飲賓伊志

陸費錫字大勝順治辛丑進士任平原知縣前令虧庫銀

四千兩繫獄為稱貸補之得釋佐其歸弟鉉不得歡于

繼母錫長跪以請母怒不釋弗敢起鉉仕鹽山歿於任

錫往歸其櫬視姪如子人無間言姪濂丁卯舉人工詩

文吳志

張嘉玲字佩葱執父喪三日不食小祥之內疏食水飲菜

果不入口三年之中衰麻不去身未嘗沐浴入內室連

遭八喪一身任之弟嘉瑾字宣城行與之同友愛尤至

言行見聞錄

施國楨庠生敦品節兄弟四人至老不析箸嘗鬻奩田為

季弟完姻出內資嫁兄女獨力葬親不取助於兄弟吳志

朱承慶字甯宇事父色養兼至垂髻喪母每當節序薦時

食輒涔涔淚下性好施飢者推食寒者解衣遇比閭族

黨之死喪患難尤加意賑之康熙四年舉鄉飲賓伊志

錢枋字爾載庠生工詩古文遊京師為名公鉅卿傾倒性孝友讓產于堂弟宗族中近支之不能葬者葬之

施永譽字季璠事父孝明季兵亂適父病負匿雖當流離時必竭力以進甘旨學使者鄭開極表其閭以上吳志

薛陞康熙庚戌大水陞偕士民計灑孔尚宗僧卓巖輩倡義捐輸設法募賑活饑民十萬有奇府縣獎之桐鄉徐志

孔尚忠字明凡事父孝待羣從子姪以恩好解紛釋難有不能婚者助之死者樁之郡縣兩舉鄉飲賓康熙九年大水勸募賑粥活民甚眾巡撫范承謨行縣給帖以獎

年八十八無疾而終烏青文獻

李尚白成德子康熙庚戌水災能繼父志捐賑鄰里年九十子逢源有聲鬻序年七十舉鄉飲賓堅辭不赴吳志

張淇彥字榮英青鎮人歲貢生授甯波府訓導踐履篤實以文行兼優薦擢磁州知州康熙九年舉鄉飲賓時鄰舍災火延淇彥宅忽返風火滅人稱德感新補纂

魏雲瞻性至孝父疾藥不能效雲瞻顛天割股以進父尋愈年三十七卒范文裕母病篤割股以進得愈邑令獎之見聞偶記參袁志

張景曾字行表父賁自杭遷桐性至孝父徙邊累往省視

及歿步行萬里負骨歸葬有張孝子之目

錢天濟字幼南居家友愛姪某年近五旬艱嗣濟出資買

妾生子年八十舉鄉飲賓

以上吳志

李元字明山母及氏病劇元禱天願割心肝療母農家無

利刃再割得肝少許又割之乃肺一葉天忽開霽耳中

聞音樂聲地下有聲如雷目見鬼神羅列左右瘡口不

能合遇一道者療治竟愈次年大旱惟孝子一方前後

得兩倍收康熙壬戌巡撫李某廉得其事旌表給衣

頂

舊浙江通志參吳志

于道珍字孔嘉事親以孝聞父病醫莫能治道珍割股以

療之姪繼昭字日常父病篤亦割股和藥以進病遂霍

然

伊志

計穎字質生敦行樂善無疾言遽色終身不計人是非康

熙三十四年郡邑舉鄉飲賓復表其門曰禔躬裕後

烏青

鎮志

徐時升字憶山性敦厚愷悌遇人無貴賤一主謙下子騰

以進士官知縣時升布衣韋帶抑抑如故累舉鄉飲賓

烏青文獻

李懋華字含白樂善好施官塘有登瀛橋坍塌已久華獨

力建造人賴利涉有司獎之

吳志

施昌字叔璠慷慨好施有質室廬者金以百計其人歿子

幼即返其券嘗于金陵置蠟房數篋歸中有白金百兩

愀然曰彼失銀者情何如亟齎往還之順治初劇盜橫

行凡設立水陸關隘不惜已資修治之邑令何金蘭舉

鄉飲賓辭不赴贈額曰天授神仙

烏青文獻

陳之煌字旦明孝于親友于弟弟歿遺婦馬力存恤之賴

以安節舉鄉飲郡守張照乘贈年高德劭額

段文榮字明宇本姓沈曾祖河間縣丞贅于杭之段氏因

姓焉為人和易不立崖岸多行善事鄉黨稱之康熙二

十六年邑令張承位給匾曰餘慶流長

以上烏青鎮志

田尙志性至孝多隱德康熙丙午年逾百歲學博郭宗儀

給額曰德壽垂芳

伊志

任時慶字君善父易初自休甯遷桐鄉性孝友同懷六人

養生送死皆慶獨任兄子甫七月而孤撫逾己出適為

盜掠慶曰我兄早世嗣息僅存遂傾囊贖歸次兄得瘋

疾醫藥不衰子姪林立尙未析著

吳志參桐鄉徐志

孫嘉麗字爾宣性孝友為築園亭以娛親嘗刻清夜鐘并

邵康節孝悌詩以勵俗子起鼇為仁和訓導修學造士

得義方之訓居多

張侶韓字季友庠生早孤事母至孝撫弟妹經營婚嫁盡

友愛之義居鄉遇旱潦率先救護歲禮設法助濟力學未售卒

俞廷謨字介山諸生行止端方居家敦倫睦族教子孫以讀書明理為要屢舉鄉飲介賓以上吳志

沈元楷字君瑞性純孝康熙乙未冬父亮彩患瘧疾勢不起楷日夕憂傷湯藥罔效因夜禱竈神割股和藥以進

後元楷生三子皆以孝謹稱伊志

唐廷黻字嘉侯號省齋諸生重孝友嗜詩書生平無一欺人語遠近咸敬禮焉康熙四十二年舉鄉飲賓烏青鎮志

楊大中字靜思年十五刺臂療母疾母愈見創詢之泣曰

兒知母疾之痛不知兒之痛也後父病篤不解帶者五十餘日顛天求代父疾尋瘥大中竟以憂瘁卒王應綵楊孝子

傳

李元慶篤於倫誼嘗撫孤姪養耄姊恤寡妹植孤甥屢賑

饑濟貧康熙二十年同知于琨邑令何金蘭各獎以匾

二十六年邑令張承位復以鄉飲賓禮之烏青文獻

查魏旭字次谷康熙癸酉副榜榜姓魏父繼甲為隆安知縣

卒於任值吳逆之亂道路隔絕踰二年計聞魏旭號泣

即日隻身就道跪母前訣別曰兒去萬里出入兵間得

達父櫬所萬幸能扶父櫬歸尤萬幸否則流落瘴鄉守

死父櫬旁母侍奉有兄弟在勿以為念遂行及漢陽遇賊掠捶楚無完膚又經全州寒水橋失足墮河若有掖之者浮髮水面遂遇救得不死又一夕行永州募古山中時昏黑草木叢雜不辨徑路聞狼嗥虎嘯聲信足奔屢蹶屢起僅達村舍血淋漓滿芒屨抵隆安覓至櫬所一慟殞絕踰時始甦顧無從作歸計歲餘乃嚙指血書詞哀籲道旁見者咸曰此故賢令子也稍得賻助遂扶櫬崎嶇以歸歸後疾作卧牀不能興凡三年得復故後卒命子必耐葬先塋之側

咸齋
又鈔

李之棟父琮素履醇謹以好客家日落之棟能先意承志

擴復舊業又為闢圃蒔花俾與故交娛息其中舉鄉飲

賓烏青鎮志

馮翊字輔之少為諸生以純行聞於閭里事父母及所生母俱以孝稱父歿時幼弟纔十數齡翊撫之及弟歿以己子嗣之家不甚富人有告急無不應族人有老幼不能自存者輒周給之無吝色學宮久圯倡捐修復子景

夏官侍郎浙江通志

金士瑜字子握性孝友力葬三世創置祀產遇事多過人之識濟困扶危不居其名歲饑出穀千石首倡減價平糶全活甚眾里人感之奉其主祀于鄉以孫樟貴 贈

主事吳志

王綸字書升事祖嗣光父開泰備極孝養與弟緯一堂雍

睦建涼亭以利行人吳志

汪文桂初名文楨字周士號鷗亭考授內閣中書事父母

孝於三黨九族中殫力周恤康熙戊子己丑間旱澇相

繼設粥廠立藥局全活甚眾歲丙午被水災首倡賑濟

以食饑民他若葺黌宮築城垣修橋梁開河道好義捐

資一無吝色四舉鄉飲賓浙江通志

沈允聞字大章康熙庚午舉人篤於親誼表戚陸聲遠老

而無子為之納聘得有嗣息有售產救貧者給其值不

取其產每歲設家塾備膏火課親族子姪之貧而無師

者祀鄉賢祠鄉賢畱祀冊

孫伯耀嘗至阜林拾遺金一橐坐候至暮見一人號泣而

至問之云是青鎮絲牙父負客債陷縲綆鬻妻得銀往

縣救父至此遺失伯耀還之與同至家出資償還客債

釋其父又贈以金贖其妻由是父子泣拜而去端素齋雅綴

金學汾字崑濬幼有器識與羣兒嬉水濱見一兒溺眾皆

驚走獨蹇裳救之有負重貨者憫其無以為生焚其券

有附舟歸者中途病死殮之歸其喪他若賑粥施衣修

學宮剏橋梁善事不可枚舉浙江通志

皇甫洸字思誠青鎮人少孤母命棄舉業治生人產洸仍

不廢讀教幼弟泂成立再教其遺孤五子二猶子各授

一經嘗夜登門樓匿有穿窬審視則舊相識某也勸諭

贈以錢某感悔卒改行

新補纂

周德馨母死哀毀骨立父病手足不仁竭力侍奉湯藥飲

膳便溺穢瑣之事與妻邵氏終宵數起頃刻不離

新補纂

程琳字丹雲事母以孝聞且能推孝友之誼旁及族黨遠

及異姓親族中有貧者周之有來告貸者助之無稍吝

色康熙戊子己丑間饑殍載道於縣治之城隍廟青鎮

之密印寺製棺施捨三十餘年未嘗輟捐修文廟及城

隍廟重建程忠介公祠水旱出粟賑濟

浙江通志

宋國用字調生任俠尚義一時名士皆與交北至關塞南

遊閩粵總戎聞其才辟薦之不就歸里圖籍自娛年九

十終

吳志

鍾應聰字順宇性寬厚喜怒不形人以緩急告曲應其求

壽九十八夫婦偕老五世一堂康熙丙戌邑令劉瑄書

額贈之

伊志

貝世瓏字鳴玉父鼎春有隱德康熙甲子邑令何金蘭給

額曰耆年碩德嘗試寓禾中有少女暱就踰垣避之尋

以詩酒放廢名利澹然鄉里推為隱君子

裕綦堂叢說

張德固字立方侶韓子雍正己酉舉人母患目疾德固屢

以舌舐之眼復開一姊歸朱夫婦早世遺女一撫如己

出妹亦歸朱如姊德固撫其遺子延師課讀俾入庠乾

隆二十年歲大饑率先拯濟賴以全活者甚多伊志

王見麟字乾中副貢生景山教習期滿以親老不赴選或

勸之仕泣曰官乃重于親耶歲歉率家人食糲奉親必

酒食父疾恆不解帶歿時哀毀成疾終身不仕伊志

譚觀道字楚卿性孝友父病溺澀不通觀道以口吮之兩

載獲愈與弟觀德終其身不析箸舉鄉飲賓邑令蔡可

遠給額曰樹型鄉國伊志

湯士陞字指高性至孝父患目眚家中落而樂善好施士

陞曲體親志敬供滫瀡推恩親鄰數十年不懈母唐前

歿厝淺土地鄰某謀陰壞之士陞踉蹌趨視棺已半露

時值風雪撫棺而卧夜半雪積尺許齒戰手足皴裂哭

不成聲鄰某感其孝亦悔前謀烏青鎮志

楊權字斗衡植品端方舉鄉飲賓邑令蔡可遠給國瑞家

祥額獎之孫紹基字崑田貢生倜儻負氣撫孤姪為弟

婦王顛請 旌典以彰苦節平生樂施不倦兵巡道潘

某給額曰惠周鄉里馮侍御浩有傳伊志

于應熊字黼王年十五失怙棄儒服賈上事孀母下撫諸

弟母死營葬一人任之雍正初舉孝弟力田科辭不就

次子文懋歲貢生慕洛閩之學著有隅言質錄伊志

鍾梁字來霞庠生三世同居觀風整俗使王國棟舉賢良

方正給匾獎之子元文孫竣均友愛敦睦縣給額獎伊志

周暎字且雯私淑張履祥講道一宗紫陽樸實力行詩不

多作梓有緩庵詩鈔助張履祥後人葬士林重之子世

堯字欽表稟庭訓務實學貢入成均以疾不赴選伊志

尤樹德字在田考授州同知好善樂輸乾隆六年勅建育

嬰堂樹德捐田百畝十三年歲饑出米賑之全活無算

王方伯表其門曰指困遺意同時魏承祚金佐王共捐

田於育嬰堂鄉里稱善人云伊志

施徐亨少孤母患癱瘓侍湯藥躬廁踰二十年如一日常

號泣籲天願割己算益母壽母死哀毀骨立尋病卒伊志

張仁繹字學川庠生八歲喪母盡禮如成人家貧事父色

養備至兄嫂早世遺一女如己生嫂有母沈氏家貧無

依寄養十餘年無倦容伊志

祁起元字善長自幼至孝能曲體親意親少不悅即長跪

終日候霽顏乃起十歲父卒哭踊如成人既葬席薪枕

塊泣伏墓側雖寒夜月黑悲風蕭瑟不忍一夕間也尋

以母患弱症躬侍湯藥者十有三年卒不起哀慟淚盡

繼之以血兩目失明越年餘假寐間恍聞有人呼其名
字啟眼視之彷彿父母在前嗣後目漸復明人咸歎為

至孝所感乾隆己亥以孝 旌其門 伊志

孔毓玠字介玉性肫篤出嗣於叔撫庶弟如同產生母年

逾九旬迎養無間所後父母寢疾侍湯藥數檢歿則喪

葬如禮先世墓域有廢祀者置祭產率族人享祀四世

不析爨遇歲荒捐租以為眾倡舉鄉飲賓 烏青鎮志

吳承乾字以清國子生父啟宗以鹽筴起家慷慨好施子

承乾能承其志海鹽崔孝廉學淇篤行人也傷弟病歿

不上公車承乾延至家塾事之惟謹且邀崔之孤姪共

讀用相娛慰承乾歿徃哭以詩云十年師友誼一別死

生分益紀實也 伊志

陳德星字朗瞻性至孝父病劇割股以療與弟元星璇星

共敦友愛 伊志

孫開運字大文志行芳潔卜居市廛蕭然物外舉鄉飲賓

乾隆十九年邑令王瑄以熙朝碩彥額表其門 伊志

曹汝璋字萬全幼喪母事父及繼母盡孝躬耕色養歲饑

與妻饜糠粒畱甘旨奉親親喜飲每夜市醅醪奉壺觴

歌笑以博歡父母歿汝璋年逾六旬啼泣猶似嬰兒 伊志

汪士煥字伯華乾隆十三年歲歉米昂士煥減價平糶冬

米一千石有司上其事于巡撫給額曰誼篤粉榆伊志

朱光祖字紹庭性孝友好施與宗族貧困者輒傾囊與之生日不舉觴即以資補路邑令陳虞盛重其行舉鄉飲

賓給額曰齒德兼隆伊志

陳宗字源夏性孝友與弟時憲終身不析龔乾隆間三遇歲饑宗率先輸粟賑濟學使竇公郡守梁某給額優獎

伊志

陳堅字剛中弟增字如川相與友恭乾隆己丑甲辰歲饑首捐米助賑增子天墉廩貢生署衢州府訓導讀書好義出資助修濮院之幽湖橋及南橫街鄉人利之伊志

程仁善字長人監生性慷慨表戚俞進士武琛謁選入都

卒於濟甯旅次訃至家祇遺孤七齡為之經紀歸其櫬

又資給其家俾其孤讀書游庠丙子歲祲富道設粥厥

以食飢者首輸米十六石助之舉鄉飲賓辭不赴伊志

金翎字器遠監生年十四大父沒號泣盡禮期年不見齒

父垣官刑部員外郎翎隨侍入都父疾亟夜禱願以身

代未幾父歿晝夜長號水漿不入口者數日以哀慟過

情病瀕沒呼母數聲并云得侍父于地下死亦無憾目

乃瞑年三十一青浦王侍郎昶有金孝子哀辭伊志

張仁敷府增生居嘉興縣嘉會鄉學宗濂洛與猶子中孚

析疑問難娓娓不倦嘗手輯宗譜其遠支無可訪虔禱宗祠夜夢先靈指告往詢之符所夢遂續筆焉著有家箴二十條輟耕吟藁四卷中孚庠生性和而介上事繼祖母許氏色養怡怡晚年博求先儒著作及名臣言行錄輯爲人式篤信兩編藏諸家塾年七十餘無疾而終

新補纂

孫映槐字月卿少孤貧鞠于祖母以諸生入監負雋才將應順天鄉試冀得祿養而祖母訃至日夜哭泣時春初寒甚褫裘褐弗御友人或解敝羊裘使服之堅弗受遂發病不數月死工篆隸及楷法有得月樓詩鈔伊志

于方字五英諸生慷慨好施乾隆丙子饑首捐貲設粥貧

民全活無算郡守曾某給儒林表率額表其門伊志

蔣紹輝字通文諸生性至孝嘗刲臂肉以療母疾家人初

無知者比卒殮時見其臂有瘢痕始悉伊志

曹楠字星巖庠生父母俱早歿事繼母徐孝泣陳苦節得

建坊 旌恤鄰里修祠字年七十三舉耆士給冠帶伊志

周袁勳九歲喪母哀毀如成人事繼母孝有弟三人早卒

撫姪如己出偶拾人獲于路追還之不受其謝伊志

何晉揚少時母因產後患心痛醫治弗效晉揚割左股和粥以進病愈後遭父病劇復割右股以療之恐露刀痕

雖酷暑不袒裼者五十餘年伊志

嚴大烈字競旃性儉而好義烏鎮舊有社學久廢里人沈

觀察啟震創建分水書院大烈捐金五百助備膏火其

他道路橋梁多樂輸焉伊志

嚴寶傳字瑞符大烈子力學多聞豪於詩酒凡戚族友朋

有急告罔不應券書至盈篋終其身不責償尤重讀書

計偕無資者無論識與不識咸取給焉與同鎮三太守

蔡鑾揚陸元鉉徐保字尤稱莫逆竝資以出仕援例得

光祿寺署正未供職遽卒新補纂

朱英字含叔太學生蔚弟父明儀由休甯遷桐鄉英又遷

平湖工詩文重然諾仲兄蜀獄事起株累同產英以伯

兄華未有子乃免華於難挺身赴蜀長繫三十有七年

始釋歸著有史山樵唱子鴻猷字仲嘉庠生生八歲而

父構蜀難刻苦讀書既入學即入蜀省父歸而卒著有

雲谷書堂吟藁見山樓書畫錄平湖路志新補纂

朱文燦字服章年二十八妻亡不再娶友于兄弟終身不

析筋喜周人急乾隆丙子歲饑有嘉善人抵玉溪鎮鬻

妻者券已成矣聞之急詣叩其故曰親老家貧租稅無

所出道遠可飾恥耳即為代償其值并解囊以贈越數

載其人攜妻來謝待以客禮將卒前一日盡檢篋中奴

僕券焚之至今五世同居伊志

范文裕母病篤割股肉以進病得愈知縣獎之新纂

陸溥字崑源諸生母疾割股肉煎湯以進母病尋愈館穀

所入悉以給二弟時人咸高其義新纂

陳賜麟字玉符幼失恃體素羸弱父病篤日夜泣禱無效

割股和藥以進乃瘳數月賜麟嘔血死年二十三邑令

李廷輝給奇行格天額獎之伊志

孔廣平字賦梅乾隆辛卯舉人以議叙授廣西臨川縣歷

署興業北流博白知縣鬱林州知州所至俱有政聲丙

午戊申乙卯三為同考官性至孝母病劇嘗糞以卜安

危著有碧峙軒初稟竺橋漁唱詞塲畫鈔存于志

張紹貞事嗣母盡孝與弟千里友愛甚篤具脩脯令弟從

師受業弟家貧喪偶遺兩孤減己餐鞠育之復鬻己產

為弟續娶人咸稱其高誼云于志

張千里號夢廬官訓導精醫術中表沈嗣龍亦業醫早卒

子幼千里為之治家事積逋三千金經理一清教其二

子得承世業與兄紹貞急難相扶視兄子如己子他如

賙卹貧乏代營喪葬不可勝數歷署紹興府學教諭新

城縣學訓導己亥以疾卒於家著有珠村草堂等集其

閩游草一卷已刊行于志

嘉興府志 卷六十一
徐紹昌字駿惠樂善好施乾隆五十年浙中大旱餓孳載道紹昌不俟有司勸捐卽發藏粟千石賙卹鄰里賴以安全者無算于志

倪振邦字佐周原籍休甯自其祖公權始入邑籍振邦好讀書行善買地於玉溪鎮東建骨塔分男女兩塚又捐錢穀施棉衣平治道路歲行之無倦與弟發友愛無間

新纂

仲均號樸真性孝友乾隆甲寅奉母濮氏命重建迎龍橋嘉慶辛酉又建梧桐聚鳳兩橋兄弟輯睦終身不析箸弟增先卒均撫姪如子族有難於喪葬嫁娶者悉引爲

己任歲饑捐資助賑子璜於嘉慶癸酉又建王母橋于志

沈邦佐父璜病篤邦佐年十五伏竈前割股進父愈于志

曹聲遠幼貿易吳門聞母蔣氏病篤星夜奔馳途遇劫賊聲遠泣而告之故賊義而釋之至家籲天請代割股煎

湯以進母獲愈年至九十四終于志

孔傳道字堯年庠生少孤貧舌耕養志母病篤割股以進及母沒痛極投河遇救得不死事載桐溪紀畧于志

沈基字蒼樹父烈揚緣事謫戍塞外基步從萬里晨夕扶持父歿戍所泣假於人負骨歸葬于志

孔繼源字濬夫母病危籲天願代割股和藥進病愈于志

吳文烜父琛年六十始生文烜母孔氏卒哀號數晝夜不

止時父年已七十有八老病薦臻文烜割股煎湯進卒

不起哀毀骨立以嘔血卒年十九于志

沈天如貞女沈大姑恩撫子母死號泣數晝夜水漿不入

于口以此致疾卒年三十八于志

姚振英父世融病危割股為糜食之愈李蘭蓀母病篤割

股療之尋愈數年母病復危又割右股以煑湯未進而

母已死蘭蓀哀毀幾絕蔣武章母老病卧樓上一日晨

出失火武章奔歸冒煙而入負母授人而身竟斃于火

夏鑑母病篤割股作糜以進尋痊吳燦邑庠生割股療

母病以孝聞王之樞父病割股和粥食之愈姚鳳儀農

家子年二十五始攻書旋入邑庠事母孝割股以愈難

療之疾蔣紹輝廩生割股以療母疾魏啟倫性至孝母

病篤割股和藥以進遂愈沈登元幼有至性父病衣不

解帶者三月割股煎湯以進父歿哀毀備至一如成人

均于志

姚卓元字仕安監生性孝友樂推解嘉慶戊辰甲戌間歲

洊饑出困粟倡捐悉心籌畫俾無遺漏無虛冒道光癸

未又以水滂賑饑勸捐如前更出已資為本區貧戶計

口給錢災黎得安于志

朱望汝號困齋少孤事母孝敦鄰睦族道光四年九年俱

歲歉倡議捐施于志

潘藍田字瑾含附貢生持己儉約樂行善事道光十二年

將安邑腴地二十餘畝捨為烏青義塚于志

朱明儀字羽來貢生事母孝母性嚴稍拂意輒長跪謝罪

家素豐好施與坐是家中落然偶有所入必分贍戚族

人以節省勸則曰與其積財何如積德子八人莖官編

修履端由庶吉士改兵部職方司主事丁內艱歸築別

業於嘉興之梅里中有古墓其子請移之履端曰死者

既安其宅庸可遷乎繚以短垣聽其子孫祭婦人以是

賢之新纂

沈士瑜字玉衡性孝友調貧乏舅氏有冤獄子懦怯不能

伸士瑜為代理始得雪新纂

徐錫曾字魯三監生性孝友有隱德訓子弟以禮法嘗語

人曰冀子孫賢而不敬師傅猶欲養身而反損其衣食

也時以為名言新纂

都元音字太古諸生有文名敦行尚義宗族不能就學者

代出脩脯造就之有族人墓域為豪家侵占主家不能

爭元音為代理得復其舊新纂

陸炫服賈養父母與諸弟友愛家人數十口同爨始終無

間言新纂

張錫齡字茂叔生有異稟母楊氏性畏雷錫齡奉起居不稍懈及母歿柩方在殯昏夜雷雨至錫齡必跪柩前曰兒在兒在八歲能作徑尺大字比長以書畫名於時詩文尤卓絕流輩仁和宋咸熙講學邑中勅建楊園祠堂於學宮旁命錫齡為諸生祭酒主祠事新纂

陸費明字子陽生六歲而孤年十二即肩販為業上養母兄下撫季弟一家七口俱賴以生弟囂悍好博居積俱為所耗并居室蕩盡明仍怡然也處貧窘不重利嘗得遺金一囊其人尋至即還之比鄰張姓失一金環痛撲

婢明恐婢不測以己環與之後舉鄉飲賓不就新纂

陳寶奎年十三母病篤廢寢食刲股進夜執香跪草露間訴天願以身代更殘不起父促睡偶合眼輒驚起顛如

故母病旋瘳新纂

沈寶樾號茂庭爐鎮人移居青鎮幼以孤子當室早廢舉業諳練世事勇於赴義以故長吏來者率倚為左右手即親族貧乏咸仰給焉屢以捐餉議叙至同知加知府銜分發江蘇乃淡於仕進迄未赴補庚申遭變遷滬閩族食指浩繁盡攜偕行雖疾病死喪不相捨甲子故鄉初復知遺民乏食載粟歸賑慕義者響應得米六千餘

石賑饑民七萬有奇辦理善後百廢具舉素好施藥遇
 歎暑瘟疫多回生起死功他若城鎮育嬰留嬰各堂捐
 資首倡並籌辦神墩保嬰會蔣橋接嬰堂烏鎮放生河
 阜林秀溪橋榭市塔影浜義塚掩埋均著成效甲戌乙
 亥間鎮鄉各創內外科施醫局核就醫冊籍計活二萬
 有奇男婦先是言星命者決寶懋無子中年後連舉得
 之人皆謂積善之報新纂

朱漱芳字飛泉濮院鎮人以廩貢生注選訓導性純孝遭
 祖母喪毀瘠逾恒父病禱天請代里中恤嫠保嬰惜字
 善舉竭力贊成咸豐十年七月寇踞縣城濮鎮隨陷漱

芳募園在防坎嘔血死 旌卹雲騎尉世職新纂

文苑

明

李蕃字文盛天順間官平樂府照磨居千金圩在及山之麓貝清江避地於此子翻翱翔竝有才名村民慕之多讀書自好蕃工詩有桐花開到邑侯門之句至今鄉里猶傳誦之餘若沈韶州榮希仁范貢士庸彥常陳吏目紀彥綱仲貢士剛叔堅董教諭序大倫皆圩產也惜著作皆淹沒無聞矣

靜志居詩語

潘鳳梧隆慶庚午舉人撰地水師四卷談兵家之要自表上之又著治河管見四卷

徵獻錄

趙桓字庭春少好學能詩文家貧父令為縣吏桓恥之不
得已而就父歿棄去以醫自給文士慕之爭相延譽有

烏青感古集 徵獻錄

沈葩字東野工詩善鍾王書法博涉陰陽醫卜諸書性孝

友多隱德有還金事 吳志

陸時雍字昭仲性剛好使氣不能俯仰于人能文工詩嘗

註韓子揚子淮南子選古詩唐詩曰詩鏡又論列楚詞

取王叔師朱晦庵兩家註而以己意折衷之曰離騷新

疏崇禎初詔大臣保舉巖穴異能之士時雍與焉然終

不遇久留京邸館於戴太僕家會戴以事被劾時雍為

證并逮之卒於繫所 徵獻錄參 桐鄉徐志

顏統字士鳳讀書過目成誦重然諾見人過不相容隱論

古今得失疊疊見本未歿後友人張履祥輟講痛哭徒

步至其家經紀其喪收詩文藏之 吳志參楊 園見聞錄

陳其德字太華濮院人天啟中以歲貢生官嚴州府教授

制行不苟鄉黨推重所著垂訓樸語一卷統論讀書處

世之要坵紀事數則紀崇禎十三四年間災荒大旨主

敦行勸善乾隆中採進列

欽定四庫全書存目提要 新纂

濮煬字抱真諸生自少警敏絕人比長肆力於詩古文詞

手不釋卷嘗搆別墅曰水木塢因號水木居士新纂

錢寅字字虎嘗受業劉宗周講求理學與張履祥善讀書

里中吳越名宿及四方魁傑賢豪之士日相往來舟車

輻輳望重一時楊園文集

錢彥猷字常卿弱冠為名諸生著有四家文鈔名家小論

弟遠猷字懿卿著有六如齋集北山寓言伊志

國朝

周拱辰字孟侯順治間貢生擅詩古文與陸時雍交好詩

文相當而才情過之著有莊子影史離騷草木史聖兩

齋詩文集吳志參構李詩繫

張圓真字巖貞青鎮人兄超見宦蹟傳圓真少好學與烏

程凌克貞研求易義寒暑不輟張履祥講學里中圓真

請益無虛日其問答語載楊園全集中平日過從問難

者如張嘉玲潘之章沈雪樵皆一時碩彥嘗以烏青鎮

志殘闕閱三年編纂成康熙時

欽定書畫譜頗采其說晚年哀集明人文集百餘家欲論次成

書未就歿新纂

茅星來字豈宿晚年別署鈍叟一日具茨山人歸安諸生

自湖徙桐鄉明茅坤裔孫也性迂口吃不喜為世俗文

出游吳會京師持所業就正王汝驥任啟運方苞北平

黃叔琳索所為古文讀之特製序以贈數人其推為文章宗匠星來讀書圓義精舍感宋儒科舉奪志語遂專攻古文憲章歐曾渾化無迹歸安徐鳳輝選刻

國朝二十四家文星來與焉撰近思錄集注十四卷病葉采

集解疏舛參校諸本疏通其義於名物訓詁頗詳

參歸安志

張元光字恭默諸生從張履祥游以涵養性天躬行實踐自勵見人疾言遽色亦必婉諭之賀聖武字右文歲貢生候選訓導博學善屬文持儒者心齋法不飲酒不殺生以鍵戶讀書為樂張和字行可諸生好讀性理書湛深程朱之學待人接物不傲不隨見者輒肅然起敬學

政訪舉優行贈額曰德音是茂施增字京扶諸生為人

和厚雍睦篤學不倦與同里張和賀聖武張元光竝以齒德稱長者

新纂

曹日勉字功敏順治三年舉人官直隸安州知州去煩蠲

苛民居樂業歸田後散其家資於鄉里芒屨竹杖徜徉

山澤間行吟以自樂其清節推重一時

新纂

張嘉璫字文須順治十八年進士候選推官為人瀟灑出塵有夷然不屑之致其在京師寄弟書云志尚不可不高鋒銳不可太露識見不可不曠名心不可太遂學問不可不廣馳騫不可太雜骨幹不可不樹才氣不可太

使時以為名言新纂

姚夏字大也諸生先儒張履祥弟子敦崇實行年五十遭

親喪終日嬰嬰作孺子泣哀毀骨立嘗追述其師生平

事蹟為作年譜新纂

沈廷鈺字文韓諸生後棄去耽情詩酒其自序有云屈原

賦離騷宋玉作九辯幽憂既殷悲秋特甚余生不敏觸

物多忤憂與時遇病復隨之因著秋吟詩以見志後從

友人為汙漫游卒於京邸樵李詩繫

沈槎字星浮順治間與孔自洙張超張方起稱桐川四子

三人相繼取科第而槎獨以明經老博涉書史善填詞

有補廣陵散續逍遙游等劇著有各體詩咏史絕句填

詞四十二種烏青文獻參樵李詩繫

錢汝近字崑蒼諸生博極羣書後棄舉子業足跡不入城

市詩文一歸淡雅無雕鏤痕跡著有文選旁訓輿地圖

等書吳志

錢賓王字舜枚貢生居家訓子弟以義方吳志

顏鼎受字孝嘉諸生少負異質從張履祥學通十三經九

歲能詩避盜居郡城縉紳爭延之聽講者座常滿嘗入

桂陽幕適逆藩拒命守土官半污偽命奉書徵為五經

博士逃入九疑山變服為羽士乃止寇平得歸事後母

至孝學使者以德行旌其門著有誦詩弋獲六義辨國

風演連珠等書朱檢討彝尊贈詩云桐鄉顏氏子才大

最能詩是也

吳志參經義考盛百二袖堂續筆談朱應辰清谷文集

朱來棻少通經學隱居教授與陸文靄諸人為講學會著

有大全辨訛從子戴璜字渭立拔貢生以經術聞於時

子向中字丹宸康熙癸巳五經進士

吳志

李榮昌字琪園恂恂儒雅不知有世俗機械事海甯朱一

是范驤一見傾倒每過輒作數日畱論文譚藝雄辨鋒

起聞者屈服後以貢授內閣中書著有易學微言觀成

堂詩草

樵李詩繫

汪文柏字季青附貢生官北城兵馬司指揮三載為同官

牽累改散曹始歸詩能抒寫性情興到即就與兄文桂

森暨同人酬唱橐輒先成餘事畫蘭亦妙得生意

新纂

沈機字海鷗居梅花涇自號梅花逋客工詩硬語盤空不

肯傍人門戶著有鷓笑軒橐梅涇草堂集從子堯咨字

山臞諸生少慕張履祥之學家居以孝弟為先著有晚

盥集堯咨從子鍾泰詩不事雕琢秀水陳光裕選濮川

二十九家三人皆與焉

伊志

馮嗣京字畱士詩以宋人為宗而自標新格朱太史彝尊

序之震澤口號云三疊吳詩千疊浪亂帆如雪下蘇州

一時傳為佳句屢游京師試不售以貢授長興訓導著
因樹屋梓紅亭詩草伊志

楊煒字赤雯國子生弟燮字爾梅諸生皆好學能詩為朱
彝尊潘耒所賞識煒著桐鳴草雲竹詩集燮尤精醫理
著有性理闡周易或問勸亭詩集伊志

沈之泓字心如歲貢生潛心經學與兄之潢同受業于甬
江仇兆鼇之門世以易名家至之泓益研究眾說發前
人所未發著周易井觀十二卷伊志

周瑗字淇玉拱辰孫康熙丁酉舉人學有淵源詩古文四
六典贍高華一時推作手有集若干卷藏於家伊志

沈忻如字駟襄為諸生試輒冠其曹康熙辛卯登鄉薦家
有文史園與諸名士作詩會於其中極觴咏之樂遺橐
散佚子之垣編成二卷伊志

沈中棟字隆九國子生有主敬齋論文諸刻詩宗范陸卒
年二十五橋李詩繫

陳曾祉字心隱少孤博涉經史與蔡九霞盛宜山諸人為
忘年交著有心隱詩集新纂

張仁浹字觀旂康熙五十九年舉人薦舉經學五經皆有
述作藏於家與平湖陸奎勳相匹文多短篇卓然皆經
術之言新纂

張師範字司諫歲貢生銳意詩古文書法道勁旁及鉅刻
性跌宕有幹濟才佐七閩藩幕會朱一貴等據臺灣民
人釋騷師範調護卒收復之所著平臺記甚詳晚年詩
益工著有花外集伊志

黃振運字起伯天資明敏號神童從父景倩宦游維揚登
臨弔古之作激昂慷慨得少陵之遺著有東籬集伊志

姚卓字豫章少孤貧力學敦名節領雍正丙午鄉薦三上
春官不第遂絕意進取授徒自給爲人外和內介書法
爲時推重著有秋實堂文彙伊志

金檀字星軺諸生經史圖籍靡不徧覽好聚書遇善本雖

重價不吝或假歸手鈔積數十年收藏之富甲于一邑

嘗校刊貝清江程巽隱詩文集行世所著有文瑞樓集

消暑偶錄伊志

王丹宸字靖共雍正癸卯舉人世勤耕讀獲雋後益攻苦

貫穿經史尤喜三蘇文卒後家零落著述惜俱散亡伊志

潘朝棟字宸懷諸生入太學一生奔走無所遇窮愁抑鬱

悉寄諸詩歌著有桐竹水莊詩霜月行僧集長洲沈德

潛爲之序伊志

徐肇泰字載庵性孝友撫孤姪女如己出卓犖通徹經史

晚尤肆力於詩著有棗鄂集四卷伊志

施曾錫字泳沂幼穎異讀書日數行下奉母張甚孝謹時
治酒殺與羣從燕談嬉笑以娛之乾隆丁卯以五經中
副榜嘗與同學背誦文獻通考不遺一字又善鑿書畫
考金石醫卜九流之學無不精究著詩詞三卷雜著筆
記各一卷子福元字履旋甲午舉人工詩古文詞丙申

聖駕東巡福元進平定兩金川詩冊

召試二等第一四庫全書處行走議敘知縣分發江西補福安

縣未任卒著有芳茵集東游草 新纂參伊志

沈德棻字樹馨乾隆乙酉舉人私淑張楊園研究性命之
學仿學蒨通辨例區分派別薈萃成書不樂仕進隱居

教授以終 伊志

葉良球字夔諧諸生居青鎮弱歲好游歷肆力古文遂法

葉水心近學魏叔子熟明季事實論史至不平處鬚髯

戟張與人交抑強扶弱挺任勞怨奉左傳經世為指南

雖檣危馬駭不釋手晚歸自南通州自築壽藏號亦客

居士 唐琦亦客居士
生擴志 新纂

王士駿號放翁官武義訓導僑居郡城秋涇橋故自號秋

涇潛夫嘗與名士讌集清貽堂分韻賦詩刊有清貽堂

集 橋李詩繫
續新纂

朱方藹字吉人監生工詩畫尤工長短句著有小長蘆漁

唱所與唱酬之侶若錢塘厲鶚長洲吳泰來嘉定曹仁
虎上海趙文哲皆一時名人

伊志

皇甫楨字養廷乾隆丁酉舉人授孝豐教諭書無所不窺
詩法唐人著有勘書閣詩集巡撫阮公采入輶軒錄葉
家琬字琛獻楨同榜舉人事繼母孝能曲體其意遠於
經術嘉善周震榮宰永清重其學延請禮敬爲刊所著
養蒙術人爭寶之以爲讀書法

伊志

曹士勳字名竹濮院人諸生以文學著名又善填詞秀水
朱彝尊見滿江紅一闕擊節曰此人才名當不在我下

新纂

張其是字文韓濮院人工詩風骨道上邑人沈堯咨亟稱

之

新纂

濮鑛字雖宣濮院人乾隆間副貢生潛心經義論述斐然

偕金淮濮承鈞岳洙傳撰濮川所聞記

新纂

張宏範字倫表濮院人天資敏妙善詩古文辭偕秀水陳
光裕迭主幽湖詩壇文讌流連極一時之盛書學晉人
筆勢簡逸秀水陳光裕輯濮川詩鈔三十五卷收入四
庫全書與其選者張宏範濮淙沈機楊焯楊燮張其是
沈堯咨濮光孝曹士勳鍾梁張宏牧沈鍾泰凡十二人

皆桐籍世居濮院

新纂

沈廷相字在巖濮院人乾隆中歲貢生家貧嗜學文得唐

賢三昧學政雷鎡寶光館咸禮遇之新纂

呂坤字方大濮院人工詩嘗和秀水朱彝尊鴛鴦湖櫂歌

原韻一百首所徵引多未見之書大興朱珪許為瞻聞

速藻浙江詩人之傑出者新纂

沈鑾字瘦峰諸生嗣母江氏守貞鑾色養倍至築焚香小

樓母安之不踰閩具才略入蘇藩程鑾賀長齡幕賀刊

經世文編搜羅與有力焉平生奏議均代人下筆暮年

盡焚新纂

鍾錫齡字行可濮院人諸生父振富字杏村性好碑版藏

漢唐以來石刻六百餘種皆精善錫齡年十三徧誦十

三經并旁觀九章五曹之書精求勾股割圓諸法經學

尤邃於易與里中諸子結社吟詩嘗謂人曰吳淑事類

賦多取古籍近人所增廣者不應泛及元明人語因采

唐以前事補摭若干篇新纂

朱蔚字霞山副貢生詩宗漢魏古文學曾子固性凝重不

苟言笑交友尚氣誼存春明吟藁一卷新纂

朱珪字瑜仲元豐子諸生幼負雋才博覽史籍工吟咏尤

長古體弱冠以詩謁長洲沈德潛極嘆賞之著有秋籟

閣詩藁咏史樂府伊志

嚴光祿號石帆歲貢生績學耽吟事病近人論詩宗宋派者格律卑弱乃力追唐音晚年授徒聞川聞川能詩者都承其教哀集東山大梁射襄諸集爲石帆詩鈔十卷

刻之

伊志

蔡鑾揚字浣霞年七歲誦離騷及唐人詩有所得卽執筆吟弄學政阮元奇其才命肄業詒經精舍嘉慶己未成進士授禮部儀制司主事擢員外郎遷祠祭司郎中出守福建延平府知府卒於官

新纂

蔡涵輝字大容乾隆間歲貢生工文章書法出入米董俗客欲求其書堅不肯與邑人馮浩器重之贈額曰文行

老成

新纂

金德輿字雲莊檀從孫七歲能詩累試不售援例注選部乾隆庚子

聖駕南巡進宋槧書籍

賜文綺尊補刑部奉天司主事旋乞假歸家居較正東觀漢記

諸書八種名曰史翼刊以行世性尤嗜金石彝器書畫

著有釀春詞桐華館詩鈔

伊志

朱均字學亭乾隆庚子舉人著有錦堂詩文集錄若干卷

弟垠字曜南乾隆丙午舉人著有志墨齋詩鈔

于志

楊澧字秀漪乾隆己酉舉人少負盛名不欲以文藝自鳴

嘉興府志 卷六十一
惟以植人品敦根本為務著有爾雅音準一經樓詩賦
就正編手鈔各書百餘册于志

屠本仁字任之乾隆己酉舉人官麗水教諭著有濮院志
碧玉壺吟稟于志

汪淮號小海貢生工詩文善書著有黟山記游及小海自
定詩又選浙東西詩鈔二十卷于志

馮洽號秋鶴鈴子生而穎異立品高潔承祖父訓為文尚
實學書學二王畫亦精妙名列張庚畫徵錄于志

程鵬程字南谷邑諸生踐履篤實博極羣書著有續楊園
近古錄四卷勸誠類鈔十二卷桐溪詩餘十卷桐溪紀

畧八卷已刊行于志

柴維壩廩膳生淹貫經義年少能文著有秋水贖稟于志

柴源號石泉邑諸生書法直逼董香光梁同書亟賞之工
吟咏與同里孫貫中號古杉黃焯號希谷輩並擅詩名

柴有桐蔭草堂詩鈔孫有桐溪草堂等詩十四卷黃有
六宜樓詩彙行世于志

都青第號杏雲弟蓉第號采江俱貢生工詩文青第有寫
神百詠已刊行于志

沈世勳號石矚邑諸生程綸號葦村貢生皆博學工詩沈
著有卷石山房詩鈔程著有葦村詩文等稟于志

徐畿字宏京增廣生淹貫百家尤工於詩與老友陳古漁

互相唱酬徐有春郊詩集陳著有古漁詩鈔于志

楊樹本字大立以副貢任州司馬晉湖北鶴峯州牧罷官

歸里文史自娛著有蔭軒文彙紀元備考濮院瑣志等

書少工入法年逾八旬尚能揮翰嘉慶辛未重游泮宮

癸酉重宴鹿鳴于志

嚴銓字琴史廩生刻苦為學日課一文晚乃入資以訓導

候選遇粵匪亂寓懷於詩筆力排奐有昌黎風格新纂

金安瀾號瀛仙道光戊子舉人已丑進士授庶常改戶曹

以京員赴南河補銅沛同知調外北宣防得力卓薦仕

至松江府知府生平著述尤長駢體服官茨防佐河帥

楊箋奏才驚絕豔比至雲間亦假儒術飾吏治卸篆有

自訟詩以未殉孤城終屬負國為憾著有怡雲廬詩文

集新纂

孔憲采字雅六廩貢生援例以訓導註選中年游歷秦汴

甘涼挾策長征不得志歸晚就冷官權篆處州景甯正

副兩齋團防捐輸叠得優叙復署慶元麗水兩學畱心

掌故輯有小桃源記畧家烏青鎮故鄉文獻尤復雅意

搜羅排比成編曰雙溪文匯詩匯其所自著曰雙桂軒

古文老學菴詩彙新纂

鄭鳳鏘字拙言道光甲午舉人甲辰大挑授衢州開化縣
 教諭俸滿保薦知縣堅辭之訓士先器識後文藝崖岸
 自立親炙者皆肅然所居新塍鎮市集已久掌故無稽
 乃倣府志門目成書凡勝蹟殘碑有關風教者不憚親
 歷郊垌手探歸筆且據朱彝尊歌詩註易新城爲新塍
 字從俗從宜通今有識題曰塍志共十四卷新纂

隱逸

明

馮其隆案吳志作其龍字景雲庠生少積學工詩文有聲黌序嗜

岐黃及諸子家言善書法神宗朝會學宮圯邑令高梅

屬其隆董葺手書宣聖廟碑筆法有唐人逸致萬曆三

十二年上敕禮部訪求醫學明理之士其隆應聘至京

授聖濟殿品職拂衣賦歸逍遙蠡水以自適桐鄉徐志參濮川記

畧

曹文運號冲陽邑庠生文行爲諸生冠賦性高尚安於恬
 退家貧不事生產常至朝夕不給與弟文選怡怡一室

閉戶讀書或勸之仕則曰林麓儘佳何須朝市邑令蔣允議深重之

施九澤字敬野有高士風家縣治前塵囂不染塵市而山林者也

國朝

顧問字去疑號九野庠生年逾強仕即棄儒冠以方書活人年八十手校莊郭諸書意旨雋永

以上桐鄉徐志

顏俊彥字開眉崇禎戊辰進士仕廣州推官陞工部主事以艱歸里適明末變亂遂棄官不仕放浪江湖以終書

法學東坡蕭疎可愛著蘧園集

桐鄉徐志參嘉禾徵獻錄

顧禹卿少讀書不就選舉孝友夙著康熙丁未邑請鄉飲

士大夫咸以詩文贈之名蘭言集

桐鄉徐志

藝術

明

蔡頤字孟頤知藥性善方脈兼工詩文以醫舉越府良醫公卿多愛重之吉水周忱巡撫江南甚見禮遇有記畱

其家

柳志

陳謝表號左山始祖沂宋高宗詔醫康后獲效賜宮中掌扇以便出入禁闈由是刻木為記萬厯中謝表卜居嘉興至阜林風阻不前吹泊康涇問之則桐鄉也因占籍縣市醫名噪一時為女科冠其子孫至今猶世其家

桐鄉

徐志

金天衢號希瀛幼穎悟日讀寸書十四歲患弱症從吳門

戈蘭亭武林王紫芝診治復得指示萬歷間大疫遠近

就醫應手即愈名益著當道交薦授太醫院判辭不赴

年八十九卒著有醫學聖階醫辨醫說等書行世烏青文獻

梅玉居及山與貝瓊善精五行之術其告人吉凶禍福歷

驗不爽新纂

孫浦字濱江餘姚庠生萬歷間流寓桐鄉業岐黃嘗出游

見喪車過血從棺出問其故因產而死浦以指染血嗅

曰速啟棺吾能生之眾驚駭欽其名如所請令家人以

湯溫其腰腹少頃頓甦自為上下拊摩呻吟間生一男

其家驚喜而不知所以浦曰兒已出胞但一手誤執母

腸不能脫非藥所能為吾隔腹投以鍼鍼兒虎口痛即

縮手所以遽生無他術也取兒視之右手虎口鍼痕存

焉母子得全歿後無子葬于清河禪院之側伊志

曾鯨字波臣閩人居青鎮善丹青寫照妙入化工每圖一

像烘染數十層必極匠心而後止從游得名者甚眾孫

鑑字受伯工繪人物花鳥能世其業吳志參無聲詩史

鄒近魯字泗源畫做梅道人以衛幕歸陶情詩酒畫髓元詮新纂

沈子徹其先長興人居青鎮善磁壺文具與宜興時大彬

齊名至今士大夫家有藏其手製者價重一時桐鄉徐志

國朝

沈羽宸長興人居青鎮善製紗燈其人物花鳥俱有飛動之勢名震長安

徐志

黃光陸號承所世為武原人居青鎮隱于醫多奇方不知其所從受其視病不專切脈或望色聽聲即能辨知表裏虛實鎮當嘉湖之交以河為界光陸居河東時人稱

為河東先生

嚴應肇采芝翁傳

朱來鳳字徵羽庠生初摹十七帖後參以懷素日寫數千字如修蛇赴壑兼通醫有醫學明辨植槐堂文集

伊志

胡吉士字祥甫以瘍醫名於時凡疑難險證無不應手而

愈嘉湖士大夫家咸器重之里中徐明經曾龍患背瘡形如覆盂尅期求治云非用刼法不可取刀縱橫劃瘡行嵌藥綫然以火調治一月而瘳又一婦生乳癩索金約指一枚令束食指中節復自肩敷藥及指云七日指甲有清水溢出即愈矣已而果然

桐鄉徐志參烏青鎮志

聞人燕字瑤圃山水法王煙客兼精人物花鳥濮璜字成章馮鉅字思任皆工寫真山水出入宋元朱默字靜思善灑墨汁成山林水石人物徐樞字斗文張嵩字鶴汀茹鴻字省齋楊學詩號曜南俱善寫生以能畫名

伊志

劉恆龍字蘭亭幼嫻醫術人號火藥劉言其效之速也從

錢塘徙居濮鎮五十餘年壽七十無病而逝桐鄉仲志

王賢字世瞻業岐黃明脈理著有脈貫行世邑令蔡可遠

獎曰脈理融通伊志

張達齡字嵩年幼習儒不售究心醫學治疾多奇效嘗懸

壺虎林寓鄰沈氏婦死而未殮達齡視之謂尸厥耳亟

以湯液灌之應手而甦藥金所入輒散以濟窮困年七

十餘貧老怡然自題其齋柱云一錢罄矣還栽菊四壁

蕭然不賣琴可以想其概矣伊志

汪繩煥字祖肩工山水得法於徐白洋筆氣高遠識力亦

超家富收藏以資撫法於所居構一經堂鑿池壘石種

竹栽花居然山林幽致日哦詩作畫其中畫徵錄

金廷標字士揆父令昭原名宏字耕山工畫潑墨山水廷

標花草士女俱入能品善取影白描尤工乾隆丁丑

翠華重幸江浙繕所繪十六阿羅漢冊以獻

詔入畫院供事每畫輒蒙

御題時人榮之伊志

朱勇均字灌園諸生精秦漢篆法歷遊燕齊楚閩滇黔諸

省士大夫爭購其圖章以為珍寶刊愛古堂印譜行世

伊志

沈樸字舊士諸生善詩歌工行楷篆隸以至刻印琢硯俱

臻精妙伊志

沈允昌字耿文自元末以來世以名醫至允昌尤精脈理

治病多奇效望色切聲決生死百不一爽遠近目為神

仙年七十二無疾而卒子嗣龍得其傳于志

沈瀚字源長號天池貢生精篆刻善繪山水阮相國採入

定香亭集于志

沈樸號漁村工繪事于山水尤得倪黃家法時有范逸號

湘漁善花鳥于志

張授麟號聽松善畫花草蟲魚各極天趣嘗於齋壁寫大

小松兩株離奇屈曲遂顏其室曰聽松書學米元章道

勁有法于志

張宏牧號懶髯能詩文工篆刻有圖章粉本一册自篆者

八百方并南宋元明前後三代墨鉤印二册其專精如

此注篆學津梁一卷增注篆韻二卷詩曰懶髯集于志

朱萼號小鶴諸生精堪輿家言著有地理辨正補行世于志

程瑋字碩孚諸生精入法道勁如米顛而逸氣過之新纂

程允芳字憲星善雕刻圖章硯銘齋孫諸生沅字秋濤精

隸篆及金石刻有印可印存二書新纂

吳山字南行諸生能以儒理通醫意凡貧者不受謝或更

傾囊以助新纂

朱映奎字東軒青鎮人具鑑古識書畫皆宗董其昌新纂

楊春字南礪諸生工繪事游諸名勝嘗作圖賦詩以紀事

著香坡詩集兩浙名畫記

流寓

明

龍訓字尚伊應天府人從父遷寓青鎮挹秀橋以貢授蕭

山學諭文雅修潔士咸尊師之二溪編

戴笠字曼公杭州人能詩工篆隸不欲以儒術顯乃潛究

素問諸書懸壺濮里崇禎中楚蜀亂慨然曰此非君子

避世時耶遂從番禺人去不知所終袁志

張賁字繡虎仁和人移居桐邑永新鄉善屬文尤好奇計

為人決策運籌崇禎末總帥招諭閩海舉賁為監軍數

立功著有海雲集吳志

孫台衡餘姚人萬厯間投徒楊園里時邑中蒙師多餘姚人台衡課徒誠篤孤寒多所成就延請者爭授館餐後以道梗不得渡江僦居桐鄉卒于順治戊子門人張履

祥經紀其喪

楊園年譜

程贍生號長年休甯人少任俠散萬金不顧萬厯中隱寓梧桐鄉以醫給食食不給不以告人有餘輒以濟人無一金之宿弟某崇禎間于左帥標下為材官國變流寓金陵族人移書讓之云爾兄年逾七十族居無子爾忍度外視不以一子奉其老平弟即攜二子以宗人書至白贍生惟所置贍生曰事固宜爾老兄弟初相聚忍令

少兄弟即相離乎居數月報書宗人以次子某為後使其弟攜長子以歸

言行見聞錄

國朝

李埭字剛主一字恕谷蠡縣人康熙間舉人父明性為北方儒者私諡孝愨先生埭嘗從博陵顏元遊以躬行實踐自勵又嘗不遠千里問樂於蕭山毛奇齡傳二變四清九聲十二管之學三日卒業既來遊邑中與邑人辨古文尚書真偽及易卦象五行主客之說往復詰難咸

服博雅

新補纂

凌克貞字渝安一字之膺本名階甲申後更今名烏程人

與張履祥友善因常往來邑中履祥舉葬親社自錢寅
歿後以克貞爲眾賓長踐履篤實學者推重稱爲巷南

先生

新補纂

鄔鳴玉字仙佩吳縣人廩膳生工詩古文詞順治間以事
累棄家奉父徙桐鄉之顏家村與青墩徐子粵盛震修

評詩拈韻相友善

新補纂

許張瑋湖州人弱冠訂婚于邑之南關張氏遂家焉發憤

下帷登順治戊戌進士選庶常轉給事

吳志

程朝輔字贊皇休甯人五世居桐以積善世德稱

吳志

汪可鎮字景仁休甯人徙於邑之梧溪居家一敦孝友尤

喜周恤人以緩急請皆稱願以去舉鄉飲賓

吳志

程應魁字麗天休甯人幼遇相者決其無子且少壽乃敬

誦感應篇實力奉行康熙戊子寓桐鄉之青鎮是時疫

癘盛行友人凌茂甫病于牀夢數鬼語曰明日程君來

正人也吾儕將何之其一曰盍避之某家又曰儻彼再

至奈何不如去之明日程果往茂甫躍起曰君來吾病

愈矣具以夢告且請遍行諸病者之門旋過旋愈一鄉

頌之如神

伊志

王宗仕字殿卿休甯人秉性純孝以家計中落棄儒業往
來濮川權奇贏以供洗腆遂家焉一生敦倫重義有獨

嘉興府志 卷之十一
行君子之風以子應綵貴 贈朝議大夫 伊志

吳玉潤字方劉休甯人經商桐邑卜居于石人涇乾隆壬戌販麥百石返徽行至小金山適久雨溪漲溺水者順流而下玉潤僱舟拯救給以衣食濟活無算子襄有傳

伊志

鮑廷博字以文本歙人以商籍生員寄居桐邑青鎮之楊樹灣乾隆癸巳進善本六百餘種其唐闕史及武經總要二書皆蒙

御題廷博卽以闕史冠知不足齋叢書嘉慶十八年以叢書二十六集進復奉

上諭賞給舉人著有華韻軒咏物詩存 于志

蕭南金號德齋自歙縣從父至杭遂家於桐之青鎮乾隆五十年以旱荒出金倡捐全活甚眾嘉慶九年又以水

澇設厰施粥子謙復助金以襄其事 于志

舒位號鐵雲大興人十歲卽下筆成章乾隆戊申舉於鄉甲寅奉母居邑之鄉思橋貽友書云比張融之居建業彼尙多此一舟若相如之返成都我并無其四壁沈青齋見之卽以南花橋老屋借居居十年九上春官不第絕意進取詩名噪甚著瓶水齋皋橋今雨等集 小匏庵詩話新纂

黃道琰福建人幼嗜畫航海來桐愛寫山水

新纂

劉曦字升庵河南人咸豐癸丑進士前署於潛縣事庚申

歲乞假訪醫流寓屠甸鎮之鈕家橋八月初二日賊破

屠甸曦被執不屈賊割刃其腹腸出匍匐赴水死

新纂

[Faded bleed-through text from the reverse side of the page]

